

LESA ALASUNGA

I CEBO CAKWE

 [Munyina Neville atila, “Lesa akupale, Munyina Branham.”—Kale.] Mpepelako. [“Ameni.”]

² Mwashibukeni, mwe fibusa. Lyena lishuko ilisuma pakuba muno munshita ya lucelo, kumulimo wakwa Shikulu, napakumfwa uku ukusengelwa ukusuma nesenge. Cilapilibula icintu cimo kumutima wamulendo, pakumfwa umupashi wakusengelwa. Namwishiba, cisa fye kuli imwe, kabili kwalibafye icintu cimo, icishisenda icifulo ca ciko. Kabili pakubwela nakabili kwi hema, kabili, pamo, mu mulimo uwakwa Shikulwifwe uwapalwa.

³ Kabili nomba natukwata umulimo wakubika abana kuli Shikulu, lelo Ndetontonkanya limbi twalakwatafye ico munshita iinono.

⁴ Tulepalama kwi Pasaka. Ndetontonkanya lileisa nalimo pabushiku bwalenga amakumi yabili na bumo. Kabili Nalefwaya ukwisa kuno mukwangufyanya panono, mukumona abakalamba pamo na Munyina Neville. Kabili palwa... Ine... Limbi kuti caba icintu icisuma nga cakutula twakwete ukulongana ukunono pano, ilyo fye takulaba u—ukulongana kwape Pasaka. Nalimo ukutendeka, cibe, pali Citatu nokufika pa Mulungu, nokulekeleshako no mulimo wa lubatisho pa Mulungu we Pasaka. Nokukwata uunono... umusonkano, ukwisa pamo. Ili li hema ilinono ilyo Nafukatilwemo. Chalichi candi icakubalilapo kabili ceka fye. Kabili kuti Natemwa fye ukubwela pali ishi nshiku isha mushilo, kabili—kabili nokupepa Shikulu pamo na imwe bonse. Fyonse fili nokuba nobubile palwa ico, ndetontonkanya ukutula cili nokuba ubufwayo bwakwa Shikulu? [Ulukuta lwatila, “Ameni.”—Kale.] Ee. Ukuba, Shikulu nga asuminisha, ifwe tukatendeka pali Citatu, ilyo Ipasaka talilafika pa Mulungu.

⁵ Kabili Ndefwaya ukulanda ukutula limbi kuti naipusha kasunga wa cipao, nangu nabacetekelwa na bonse, ngacakutula kuti babika icakwishibisha mwipepala pano pancende pamo. Kabili nokweba abana ukutula tuli pano mukupepa, kabili tuli nokutemwa ukukwata isenge ilinono pamo nabo bonse. Abanono, icili kwati ukwisa kwa kumwesu, kabili nokupekanya pali ico...

⁶ Limbi Shikulu ali nokutupela ukubuka ukwa—ukwa cipandwa cikalamba ica Mupashi Wakwe, pali uku ukwisa kwe Pasaka. Kwena—kwena...kwati kupwa lusuba nenshita

yakupuka kwamabula kufimuti. Ndetontonkanya ukupuuka ninshita yaba iisuma nganshi, lintu ifintu fyonse fyatampa ukukwata imimonekele iipya nobwikashi bupya, kabili ciletwibukisha ukubuka. Ipasaka lisa panshita iyalinga nganshi, munshita yakupuka kwafintu. Ngacakutula kuti twamona, i Cebo cakwa Lesa lyonse cendafye bwino bwino icalungama nobubumbo Bwakwe, nefyaba ngefyo. Eico efyo twaba...

⁷ Ngacakutula Shikulu asuminisha, nomba, tuli nokutampa ici. Kabili—kabili ngacakutula bali nokubikamo icakulangisha icinono, Natile, mwi pepala. Kabili tamufwile ukucipanga ico icakucebula. Mukebefye ifibusa ukutula tulefwaya ukupepela Shikulu capamo. Kabili kuti twatemwafye, bonse abo abengafwaya ukwisa, nokukwata isenge pamo naifwe, pakashita akanono. Tuli nokuba abansansa nga baisa, amachalichi yonse.

⁸ Kabili mukaye pali lanya nokweba abena mupalamano benu palwa ico. Nokubeba ukutula tukalandafye palwa kwa Shikulu, kabili—kabili bonse fye tuka Mupepela capamo.

⁹ Kuti naba ngo wakusela, ngacakutula kuti caba ica kutemuna na bantu, kabili icisuma mu cinso cakwa Lesa, kabili cilifye bwino nabatatu, Kuti natemwa ba Neville Trio ukutwafwilisha muli ilya nshita. Bushe imwe bonse teti mutemwe? [Ulukuta lwatila, “Ameni.”—Kale.] Ico nacilungama. Kabili eico tuli nokumona ukutula bena basakamanwa, muli uyu musango, nga cakutula Shikulu amona ukutula cili icalinga kuli ifwe ukucita ico. Kabili eico twitila bakemba bambi ukufuma muma chalichi yapusana pusana, ukwisa no—no kutwafwilisha ilyo tuletwalilila. Bakemba ukufuma mu chalichi cenu, kuti twaba abansansa ukubakwata. Wamona Munyina Neville, limbi ubushiku ilyo tabulafika, kabili ukwesha ukubabika pa butantiko, pakutula batwimbilako.

¹⁰ Twalitemwa ukwimba ukusuma. Kuti nafwayafye ukukwata inshita iisuma, inshita iyakwisa kumwesu iyakale, apo tufwilefye twaisa capamo. Kabili nokukwata Angie. Apo... Bushe Nkashi Angie ali pano muno lucelo? Muleteni, pakutula ena na Nkashi Gertie bembe *Inshita Yakwisa Ku Mwesu* pamo pamuku umo kuli ifwe, kabili *Twalililenipo Ukwikatilila*. Kabili ico kuti camoneka kwati cintu cimo icakutampa ukupuputulwa nakabili, Nkashi Gertie. Amenshi ayengi yalipita mu mumana ukutulafye apo twatampile ukwimba ulo pano.

¹¹ Nakwete ubushiku ubwa kufyalilwapo mailo, kabili Ni—Ninjishiba ukuti Nshili nakabili umulumendo. Natile, “Nincilapo pa makumi yabili na ine nomba. Eico...” Kabili, nomba, iyo fye e myaka yandi... Nshilependa intu Ndi nayo, kucifyalilwa, ku mubili, Ndependafye imyaka yandi iya ku mupashi, mwamona. Nalimo palwa makumi yabili naine iyapitapo, iyo Nafyelwe cipya cipya. Kabili, ico, ca Muyayaya.

Kabili buli nokuba . . . Bumo ubukalamba, ubwapalwa ubushiku bwakufyalilwapo. Kabili tabwakatale abupita, ico e cintu cimo icishinka.

¹² Nomba, Ndefwaya Nkashi Gertie, ngacakutula kuti acita . . . ilyo tatulaleta abana abanono mukubabika kuli Shikulu. Nomba, inshita ishingi . . .

¹³ Muli Baibele, tulesanga ukutula, incende fye imo iyo Naishibapo, mu Malembo, apo ifunde, lya tunya . . . Nomba, abantu abengi balabasansa, namwishiba, nokuciita ulubatisho, nefyaba ngefyo. Ico, ico—ico cilifye bwino. Lelo lyonse Ndeshafye, kwati ukwikalafye munshila Baibele yalandilamo cena, namwishiba. Kabili muli Baibele, bena tabatalile ababatisha abana abanono. Nangula ukubasansa amenshi. Bena babaletelafye kuli Shikulu wesu, kabili Abasendele mu maboko Yakwe, no kubapala, kabili atile, “Lekeni abana abanono bese kuli Ine, kabili mwibakanya, pantu kuli abo ebo Ubufumu bwa mu Muulu bwabelapo.”

¹⁴ Kabili icintu iceni cali, nomba, ukutula Njiswilefye bwino muli Baibele, bwino bwinofye apo ico caba, muli Mako 10. Ilifye apapene, pa cinso candi.

¹⁵ Kabili eico, Shikulu, aletele abana abanono . . . Baletele abana banono kuli Ena, kabili Abapalilefye, nokutula, “Lekeni abana abanono bese kuli Ine, kabili mwibalesha, pantu Ubufumu bwaba bwabo.”

¹⁶ Nomba, twalishiba ukutula Shikulu wesu aliya mu Bukata, no Mupashi Wakwe wabwelele mu Chalichi, ukutwalililapo ne Mbila mpaka Akabwele nakabili. Tulelolesha kuli ico.

¹⁷ Kabili nenshila tucitilamo ico pano, kuletafye abanono, kabili twaleta na bakalamba bamu chalichi, kabili Ndabula nabana abanono ukubaleta kuli Shikulu. Ndetontonkanya ukutula kweni kulongana ukunono ukusuma nganshi, ukumona balya abantu abanono. Pantu, cena cili, te mulandu ifyo twaba abacaice, ifyo twaba abakalamba, umo uyo pali balya abana banono akwatafye incende mu mitima yesu. Bushe ico tacili icalungama?

¹⁸ Nomba, ilyo twaisa kuli Lesa, ifyo efyo tuba mu mutima wakwa Lesa. Tatufuma pali iyo incende. Tubafye lyonse abana banono.

¹⁹ Ilyo Abrahamu ali namakumi pabula na pabula, alifye mwana umunono, kuli Lesa. Lesa amwebele, atile, “Nine ibele ilyo onkako, Abrahamu. Mwamona, shintililafye—fye pali Ine, kabili nokusungwa, kabili fyonse filebafye bwino.” Kabili Acinjishe Abrahamu ukumubweseshisa ku muntu umulumendo nakabili, ukupitilafye mukutwalilila ukwikatilila ku Cebo Cakwe.

²⁰ Kabili Ndecetekela tulemba ulwimbo ulunono, ulwakutila *Baleteni Mukati*. Kabili leteni abana benu kuno nomba, imwe mwebalefwaya ukubabika mumaboko yakwe. Nalaipusha abakalamba ngacakutula kuti baisa kuntanshi, pamo. Cisuma.

...baleteni mukati,
Baleteni ukubafumya mu ncende sha lubembu;
Baleteni mukati, baleteni mukati,
Leteni abendauka bamo kuli Yesu.

²¹ Oh, ifyo Natemwa ukumona aba bantu abanono! Nomba, ishina lyobe—lyobe niwe nani? [Munyina Riddle says, “Riddle.”—Kale.] Ishina lyakwe ni nani? [“Sharon Louise.”] Umunono Sharon Louise Riddle. Kabili Ndi uwashininkisha ukutula ifwe bonse twalitemwa Munyina na Nkashi Riddle. Twalimwishiba Munyina Riddle pano. Emwine wetuka bashitishamo insapato shama buti mu musumba. Kabili nabakwata umwana umusuma pano, umunono Sharon, Sharon Louise, Sharon Louise Riddle. Akwete imyaka inga, Munyina na Nkashi Riddle? [Munyina Riddle atila, “Imyeshi ine.”] Imyeshi ine. Owe, owe! Ako kalubi akanono ku mutima, bushe teifyo?

²² Kabili, nomba, Shikulu alipela kuli imwe uyu umunono uwatemwikwa, kabili nomba mulemubika kuli Ena, ukumubika mumaboko Yakwe, uyo Lesa, Uyo uwamipela, mulemubwesha kuli Ena. Ukumupela kuli Ena, ukutula Engapala umweo wakwe uunono nokuupanga wena umweo wa mulimo. Kabili nokuupanga u...Ndepepa ukutula Lesa amupange ukuba umwana uwingapala umutima obe lintu uli nokukula, kabili ngacakutila Yesu akokola ukwisa, kabili ali nokuba umubomfi umukalamba kuli Lesa. Kabili muli nokumfwa bwino pali uyu umukashana umunono. Lekeneni Lesa afikilishe ico nomba ilyo twamubula, ukumupala.

²³ Ndefwaya bonse ba namayo, kabili, ifyofine, nabaume, pamo, baloleshe pali uyu umwana umunono umusuma. Bushe ico taciweme? Sharon Munono.

Natukontamike imitwe yesu nomba.

²⁴ Mwebapalwa Taata wesu uwamu Myuulu, mu Cebo cenu icisuma tubelenga ukutula baletete kuli Imwe abana abanono, ukutula Mwingabikapo amaboko Yenu pali bena nokubapala. Kabili nomba, aba abaupana, muno lucelo, ici cupo camushilo, Mwalipela mukucetekelwa kwabo, uyu umwana umusuma uwatemwikwa, umunono Sharon Riddle. Kabili twapepa, mwebatemwikwa Taata wamu Myuulu, ukutula Mwalapala uyu mwana, ilyo baleisa muno lucelo ukumupela mumaboko yenu, ukubwesha umwana kuli Umo Uwamupele. Kabili Na Mwipusha, mwe Lesa, ukubapala, paleni imyeo yabo. Kabili lekeneni uyu umwana umunono, abe no mweo, akekule nokukwata ubumi ubwapwililika, kabili nokuba umubomfi Wenu. Kabili

lekeni akabe umwanakashi uyo uwaba pa mutima wakwa Lesa, kabili na—napamutima waba fyashi. Fikilisheni ico, Shikulu.

²⁵ Kabili nomba, nga fwebakalamba Benu, twapela uyu mwana kuli Imwe, ngafintu bamubikile mumaboko yandi, kabili Namupela kuli Imwe. Mwi Shina lyakwa Kristu, lekeni Mupale uyu mwana. Kabili lekeni engaba no mweo nokukula, nokuba uwamaka nobumi ubusuma, kabili umubomfi wakwa Lesa. Twaipusha ici ilyo twamubika kuli Imwe, mwi Shina lyakwa Yesu Kristu. Amen.

Akupale, wemunono umutemwikwa. Uli mwana umunono umusuma.

²⁶ Lesa amupale, imwe bonse babili. Kabili lekeni mukwate ukusangalala ukwingi mukukusha uyu mukashana munono.

Tukesa tulesangalala, pakuleta imyanshi.

Pakuleta imyanshi, pakuleta imyanshi,

pakuleta imyanshi,

Tukesa tulesangalala, pakuleta imyanshi;

Pakuleta imyanshi, pakuleta imyanshi,

pakuleta imyanshi,

Tukesa tulesangalala, pakuleta imyanshi.

Bushe tacakawame nomba?

Nomba natukontamike imitwe yesu pakashita akanono, mwipepo.

²⁷ O mwe Lesa, Mwebapangile imyuulu ne sonde, lekenifye umupu Wakwe ukuya ne Cebo Cakwe, kabili ne cintu conse caliba pa ncende yaciko iyalungama. Isonde, umweshi, intanda, nafyonse fyaile muncende, ngafintu fye Lesa apemene pa Cebo Cakwe.

²⁸ Kabili, O mwe Lesa, ileelo, twaipusha ukutula Mwalapemena pa Cebo Cenu, ilyo tuleesha uku Cileta ku bantu. Lekeni Cibule incende Yaciko, muno lucelco, incende Yaciko, kabili nokuba icalimbwa kabili icabikwa mumutima onse, ukutula umuntu onse pano engapokelela amapalo Yenu.

²⁹ Afwilisheni abo, Shikulu, abo abafuma munshila, abalemana kabili abalemana mumipashi yabo. Kabili taba Mwishiba ukuba Kapususha uutemwa, ngafintu twakwata ishuko lisuma ukucita ico. Twapepa ukutula Mwalabapala mubwingi, ileelo. Kabili lekeni, lintu balafuma muli cino cikulwa, babe abansansa kabili abasangalala, pali Kristu uwasangwa uo baisa ishiba munshita yakuno kulongana.

³⁰ Ngacakutula kuliko bamo abasendelwe, kumasakamiko ye sonde, O mwe Lesa, babwesheni. Kabili abalwele nabalekabila, Taata, twabapepelako, ukutula Mwalaundapa umuntu onse umulwele pano, ileelo. Koselesheni abo abafunshika. Kabili paleni abo abekatilile mucishinka. Fikilisheni ico, Shikulu. Lekeni u Mupashi Wenu ube pali bonse.

³¹ Paleni i Cebo ilyo Cilebilwa; na kalanda uyo uuli noku Cilanda, kabili na bakomfwa abo abali noku Cumfwa. Kabili, bonse capamo, bakwate ubukata pali kuno kulongana muno lucelo, pantu twaipusha ico mwi Shina lyakwa Kristu. Amen.

³² Nomba, Nshikwetefye ukutusha ukufuma pakulongana ukutali, uko nomba ukuli imyeshi ine, kabili noku ukulongana kwaku lekelesha pa milungu isano kwaliba ukwakunasha. Pantu, twakwete ukulongana ukusuma ukuya fye monse mu calo, nomba, ukufuma ku New York ukufika ku San Francisco; isonde lyonse, ukuya tulepetana-petana, ukubwelela kunuma nokuya kuntanshi, ngafintu twaabuka. Kabili Shikulu alipususha abengi, imyanda iingi iya bantu.

³³ Pa Mulungu wafumineko, umulungu umo uwapitapo, eka, Taata wesu uwapalwa uwamu Myuulu, Namwene pakati ka makana, ukufika ku myanda ikumi limo na fisano, ababembu ukulapila pa nshita imo, pa cipailo, ku Oakland, ku California, mu cibansa icikalamba. Mwalifye umwaisula. Kabili twa—twaikefye pakati akancende pakatifye, mucifulo ca—cakuba mumbali ya cibansa. Kabili Shikulu atupalilefye.

³⁴ Kabili twalikwete, mulya, icinkunkuma icikalamba, ngefyo mwaumfwile. Kabili kuumukashi wandi uwakubalilapo wali muku wakubalilapo ukusangwamo. Alifye uwatutuma panono, panuma. Cali icamaka nganshi, ilyo icikulwa casunkene, kabili nolukungu lwaimine, kabili namabotolo pa...Twaiminine mwituka bashitishamo umuti, twaleshita amakadi ayakutuma ku ng'anda, amabotolo yasunkene, nomupita icushi mwaponene. Kabili necikulwa icikalamba casunkene mumaka naco; imisebo yaiswike, nolubali lwauko lwabundukile mukati. Kabili cena citwibukishafye ukutila icilembo cili pacibumba. "Kukaba ifinkukuma mu ncende ishalekana lekana."

³⁵ Muli bulya ubushiku bumo, ifinkunkuma cinekonse konse fyaumine ulya umusumba umo wine. Kabili nomba nalimo teni koloko ilya nshita ya bushiku, twaishileingila fye, nangu teni sate, kabili ukuya mukulala; kabili i—inyali yaikele pakati panshi, yali kwati yapona, kuli cimbi icinkukuma icikalamba. Cilelangishafye, ukutila ba mailoshi amakana cine konse konse pesamba lyesu, tapali nangu cimo lelo calepyafye, mumatipa yakashika.

³⁶ Kabili califye nipali ilya nshita, twaleumfwa bakalesha (besu) ukwabuka bemba, ukulanda ukutila baleseshe abantu ukuya mu Scandinavia, nefyaba ngefyo, ukutila bali nokubonaula ukubapwishishisha ne filwilo fyama bomba. Kabili twalesunguka cinshi icili nokucitika ilyo bali nokutampa ukuponya ayo amabomba nokulalepaula isho incende ukushingisha mu mushili. Lintu, cili nokubafye bwino bwino ukucita ico Lesa alandile ukucita. "Tacali nokuba kabili amenshi, lelo umulilo pali ino nshita."

³⁷ Eico, cilaleta ukusangalala ku mutima wa mumtu ulelolala Ukwisa kwa kwa Shikulu, kabili ora iyapalwa ukutila ilyo iyi mibili iyakale ikapilibulwa nokupalana no mubili Wakwe Wine uwa bukata. Kabili ifwe tuka Mumona. Takwakabe nakabili ukulwishanya, takwakabe nakabili ubulanda, takwakabe abakote nakabili, takwakabe nakabili inshiku ishakutwalilila, takwakabe insala nakabili, takwakabe ukusakamana, takwakabe amalwele nakabili, takwakabe nakabili imfwa.

³⁸ Oh, ifwe tekuti tumubepe! Ndekweba, cibusa! Cintu cakosa pantu tuli bantu, kabili imfwa cintu ico ifwe bonse twapata ukukumanya. Lelo cena—cena kutusha ukwapalwa, cintu icapalwa, ukwishiba ukutila Ali nokwisa ubushiku bumo, kabili ifi fintu fili nokucinja.

³⁹ Nomba, ibukisheni, kabili mukaye kubenu . . . ukucilapo ba cibusa benu ababembu, nomba, ukuti bakese kumusonkano, ukupuputulwa ukuleisa.

⁴⁰ Nomba, munshilafye imo iyakulanda, pamukoshi pamwandi, nga fintu Nalandile, tapalaba bwino, libe, bwino bwinofye, kabili Ncili uwanaka panono. Lelo, Nalitushishe, uno mulungu, nalitalwike kuli lanya nefintu fyonse, pakutila Ningakwata inshiku ishinono ishakutusha.

⁴¹ Kabili nomba, uyu mulungu uleisa, Ndefwaya ukutushako panono, nga kuti Nacita ico, nokuipekanya kukupuputulwa ukunono. Nomba Ndi nokuya ku Canada, kabili ukufuma ku Canada kuya ku Indianapolis. Ukufuma ku Indianapolis ninshi kuya ku Chicago. Kabili ukufuma ku Chicago . . . Uyo e Musonkano wa Calo conse uwa ba Shimakwebo Abena Kristu. Kabili balimpela inshiku. Nomba, mulempepelako, kabili ukucilapo munshita yakupuputulwa uku, uko Lesa ali nokuntungulula. Ukutandala kwe sonde lyonse ukwakutampa mu Kapepo kakalamba, nokubwela muli Cinshi kubili, nangu mu Cikungulu pepo, ukucila. Kabili ico kuya mu Europe, mu Asia, ukupita monse mufishi, muli ba bamba, nokubwela ukupita, ku lulamba lwa ku West Coast. Ukufuma ku kabanga, nokuya mwisonde monse, ukubwekela ku West Coast. Inshita iyakukabila nganshi!

⁴² Kabili nomba kwaliba icintu cimo icimbebeta panono. Nshishibe nga cakutila cintu cimo icili mu musebo, nangu cinshi, Nshishibe. Lelo, mumpepeleko, na Lesa icine cine ali nokubomba icalungama.

⁴³ Nomba, Ninkwata ififulo fibili mu Malembo ifyo Nsalile muno lucelo ukubelenga, pamulandu wa ici, ifi abantu baleisa, bena bali nokupepelwa. Ino ninshitafye iinono iyakupepela abalwele nabalekabila. Kabili Ndefwaya ukufundishafye panono pa Cebo.

44 Nomba, limbi, Shikulu nga asuminisha, munshita yabushiku, limbi tekufundafye, lelo ukushimikila panono ukufuma mu Cebo.

45 Nomba Ndefwaya ukubelenga ukufuma muncende shibili, kabili ico cili mulya mu Cipangano Cakale, shonse shibili. Mumo nimu Mpendwa, chapitala 13, kabili na—na vesi ya 30. Kabili kumbi kuli muli Yoshua, chapitala 1, na vesi ya 9.

Kabili Kalebu atalalike abantu pacinso cakwa Mose, kabili atile, Lekenituninike iline, nokuyacikatilila; pantu tuli abengakwanisha ukucicimfya.

46 Kabili namulya muli Yoshua, vesi ya 9 chapitala 1.

Bushe Nshamupela ifipope? Koseni kabili kwateni ukushipa ukukalamba; mwitina, kabili mwiba abapapuka: pantu SHIKULU Lesa wenu ali naimwe konse uko muleya.

47 Kabili lekeni Shikulu alundepo amapalo Yakwe ku Cebo Cakwe. Nalitemwafye i Cebo. Kabili nga kuti Nalanda pe sambililo, muno lucelo, Ndefwaya ukubula umutwe we lyashi muno, isambililo, ilitwa: *Lesa Alasunga I Cebo Cakwe*. Nomba, cena cili... Ifwe kuti twaikala pali ico pa milungu; kwakwata ukupuputulwa kwakupwa umwaka kabili ukubafye abacincimushiwa kumpela nga fintu twali kukutampa, pali ilyo isambililo, ilya, *Lesa Alasunga I Cebo Cakwe*.

48 Kwaliba icintu cimo ico Lesa tekuti acite. Bushe mwalitala amutontonkanya pali ico? Kwaba icintu cimo ico Lesa tekuti acite, ico kufilwa. Ena kuti acita ifintu fyonse kano kufilwa, lelo Ena tekuti aphilwe. Eico, nga cikutila icakushininkisha cesu ica mushilo cakulwa, muno lucelo, pali ulya Umo umusuma Uyo uwingacita icili conse ico icili nokucitwa, kanofye ukufilwa, ifyo tufwile ukukwata icakushininkisha mu Cebo Cakwe ica Muyayaya!

49 Umutima wandi walisunkanishiwa mumwaka wafumako, panama Nalolesha mufyalo nafikaba, munshila fiblelelemo, namasambililo ayanono yaleima. Cena ciletafye bwino bwino kukwibukisha kwandi, ifyalembwa pacilibwe cilya icapacifutu, pa lucelo lulya ilyo twabikile kuli Shikulu... nangu ukubika ilibwe lyapa cifutu. Lintu Shikulu ambushishe; ukukana ishiba ifyo ifimonwa fyali, muli shilya inshiku.

50 Ndelolesha umufumina ishushi pamulu wa ng'anda, amafiti yasano nangu ukucilapo ukufuma apo Naikela lintu icimonwa cacitike, imyaka amakumi yabili na itatu iyapitapo, mu 1933. Cali myaka amakumi yabili na ine iyapitapo, Ndesubila. Ndelolesha apapitila icushi apa pene.

51 Cali ilyo nshilaupa. Nali umushimbe, naku ng'anda. Elyo twalekulafye cino chalichi. Kabili twabikile ilibwe ilya pacifutu lulya lucelo, ilyo Shikulu ampele icimonwa. Nalibukile kabili

nalelolesha pewindo. Kabili cali mu Kapepo kakalamba, namaluba ya ma hanisako, nangu utumabula twalesapula. Kabili kulya camoneke kwati Nalile ndeenda, nangu icintu cimo. Kabili Na—Nalimwene Shikulu Yesu, kabili nalimwene ihema lyandi. Kabili Anjebele ukutila ili te hema lyandi; kabili andetele pesamba ya myulu. Mwebengi mwalicishiba icimonwa, pantu calilembwa nokupulintwa, kabili Ndecetekela ibuuku ilya fumishiwa umuku wa cine nangu cisano, amabuuku ikana umwanda umo yaliya mumitundu ikumi limo nachine lubali. Kabili monenifye ifyo ico caisa fikilishiwai ishiwi peshwi, tacafilwapo! Ifyo ifwe twisa capamo mwibumba ilinono ilya bantu abasuma, kabili ifyo Shikulu atupalile, kabili lyena ukufuma ku cifulo ukuya ku cifulo, lelo mukulekelesha mumulimo wa mbila nsuma, na mwisonde lyonse nomba, ifyo yena yaya.

⁵² Kabili ifyo inshita yafika ukutila—ukutila kuti kwaba ukucitika kwa ififintu. Ifyo isonde lingaitulikila bakafundisha, aba matwi ayababa, kabili Icine cikakanwa kabili cikalulwa mu milumbe. Kabili nomba efyo Alandile ukutila, “Shimikeni i Cebo. Ikaleni pa Cebo.” Kabili nga kwaliba icintu ico Naesha ukucita, kwikala pa Cebo cakwa Lesa ica Muyayaya.

⁵³ Tuleikala muli ba ora bakwisalila kwanshita yalino isonde. Nshilemona ifyo uuli onse engamona, monenifye mu mapepala ye lyashi, nangu ukwasha icilimba, kabili tekuti ulapile. Ine—Ine tekuti ncimone. Ico ukutila tuli fye pa—panshita iiletangilila icintu cimo icikalamba icili mupepi nokucitika. Necifyalilwa cilelangisha ici. Isonde lili nokusakamana nomwenso. Cena cilefukumuna impili shamulilo shaciko, kabili cena—cena cilekwata imibele yamwenso. Bamakumba abakalamba balesunkanya nokulepula imisebo, nefitinya ifyakumona indeke shabulungana shilepupuka, neminshishinga isho balesukusa mwisonde, nokonaula, ukonaula icalo muma miniti yasano. Tuli panshita yakumpela. Icintu cimo cile... Takwaba inshila yakulesha ico. Takwaba inshila. Kwaba fye inshila imo iyakufuminamo muli ico, kabili ico nikumulu. Takwaba inshila yakwesha ukufisaminamo. Takwaba incende yakufisamamo lelo imo.

⁵⁴ Nga fintu abakashana abanono baleimba pano, lintu Nali fye kashimikila umulumendo, baleimba ukutila:

Takwaba incende yakufisamamo pano panshi.
Naile ku mabwe kukufisa icinso candi,
Lelo amabwe yabilikishe ukutila,
“Takwaba incende ya kufisamamo pano
panshi.”

⁵⁵ Lelo kwaliba Incende iyakufisamamo. “I Shina lyakwa Shikulu cambia icamaka: abalungami babutukila muli cena,

kabili balaba abacingililwa.” Ifyo twaba abansansa pakukwata iyi Ncende yakufisamamo, panshita yampela.

⁵⁶ Kabili ilyo tulelolesha mumbali nokumona ifi fishibilo ifikalamba fileenda, kabili uku kupuputulwa kuleisa, nga cakuti Lesa asuminisha, Ndefwaya ukuya konse ukuya mu Kutendeka, nokuleta ifi fikomo ifikankala, ifyakutula, “Tuli kumpela. Tulinpano.” Ndecetekela ukutula ino nkulo ilipo, iili pe sonde ino ine nshita, e ikamona Ukwisa kwa kwa Shikulu Yesu. Ndi na makumi yane na cine konse konse. Ine limbi tekuti nkumone. Nshishibe. Kwena limbi kuti kwaisa mailo. Lelo, Nincetekela ukutula kuliko bamo muno abali nokumona Ukwisa kwa Ulya Umulungami, ukupwa kwanshita. Kabili Nincetekela ukutula fwebengi ifwe, ukucilapo abo abali muli cino chalichi muno lucelo, tabakafwe nokukota, mpaka tukamone cimo pafyabipisha ifintu ukucitika, icatala acicitikapo ku bantu, ico icili nokucitika muno mwine muli cino calo. Cena cishinka.

⁵⁷ Munyina, ifwe twalipita pa mipaka yaluse mpaka takwaba nangu cimo icashalako kano ubupingushi, lelo abalungami tabalingile ukukandilwa pamo nabashalungama. Lesa ali nokwisa, kabili Yesu ali nokulubula i Chalichi Cakwe, kabili tuli nokuya mulwelele muku Mukumanya. Kabili Cena cikaba ukutali ukucila amabomba ayali yonse nangu amafya ayali yonse, kabili tukacingililwa pali ilya nshita.

⁵⁸ Eico, mwebana, bweleleni kuli Lesa wenu, mukwangufyanya. Mwiesha ukusakana ne sonde pacintu icili conse. Fumako kuli ili sonde ilyanomba. Fumako kuli yanomba amasambililo yamipepele. Loleshafye ku Mwana wa mpaanga wakwa Lesa. Belenga Baibele yobe nokupepa, inshita yonse. Wiba uwanaka. Ulesangalala, uwansansa, pantu ubulubulo bwa Chalichi bulepalamina mupepi, lintu ifwe tuka Mumona Uyo uwatufwilile.

⁵⁹ Icakubelenga cesu cibikilwe ukwampana nenkulo ileelo. Mukubalilapo, Amalemba yakubalilapo, Nalebelenga mu Mpendwa. Cena calelanda pa bantu abo abaitilwe ukufuma ku cikalamba, icalo camaka ico cali mupepi, kabili capokelele ubupingushi bwaciko.

⁶⁰ Ndefwaya imwe mumfwe ukutula ulubembu talwikala ukwabula ukupokelela ukukandwa. nangu lichalichi, nangu ing’anda, nangu umuntu umo. Ulubembu lufwile lwabombelwapo pa bwiminishi bwa bupingushi. Tapaba inshila imbi. Tekuti lukonselelwe, ukutula, “Nacitile icishalungama nomba Nalacita icisuma.” Ico tekuti cibombe. Iwe tekuti uwikishanye, wemwine, pantu ukuwikishanya kwalicitwa kale.

⁶¹ Kwena kuyebelela, ukutula naulufyanya, kabili nomba wise ulungamike ifintu bwino.

⁶² Eico, ulubembu lufwile lwabombelwapo, kabili Lesa lyonse abomba nolubembu ukupitila mu bupingushi. Uyo e mulandu

wine Shikulwifwe afwilile imfwa iyo Afwile, pa Kalbale, nipa mulandu wakutila ulubembu lwali icintu icabipisha nganshi, bulyo bupingushi bwa lubembu bwabikilwe pali Ena. Ukutila abo abakabila, bengalekelwako, ukupitila muku Mucetekela noku Musumina nga icakucinga ulubembu. Tefyo twingaba abasuma, lelo fintu twacetekela noku Mupokelela. Kabili ilyo twa Musumina, Alesa mu mitima yesu, kabili apa epo icipandwa icisumaabela. Te pafintu twingacita; nipafintu Acita, nefyo Atucitila. Apo epo, “Alashilwe pa membu shesu, kabili acenenwe pamampulu yesu, nokukalipilwa kwa mutende wesu kwali pali Ena; kabili mufipumo Fyakwe emo twaundapilwe.”

⁶³ Nomba, aba bantu bali mulya mu Egipto pa myaka imyanda ine. Kabili bonse twalishiba pakuya kwabana ba Israele ukukalamba, kabili ifyo ukutila, kulya lubali, Lesa alibabikile mumaboko yabena Egipto. Kabili balibacushishe, pantu i Cebo cakwa Lesa catile bali nokucita ico.

⁶⁴ Nomba, Lesa alilaile Abrahamu, imyaka imyanda ine iyafumineko, ukutila abantu bakwe bakekala pakashita mumpanga imbi. Kabili ilyo inshita ya bulayo yapalama, Lesa alapekanya ifintu fyonse ku kukumanya.

⁶⁵ Oh, Nalicitemwafye ico, ilyo Natontonkanya palwa ico. Panshita fye iyakalabana! Tacelwa nangu ni miniti imo. Ena lyonse aba fye panshita. Nga kuti twaba fye ngefyo! Oh, ifwe tulesha ukusunka ico icintu. Tulesha ukucipanga inshita yesu. Lelo ifwe tekuti tucite ico. Lesa apanga ico mubushiku Bwakwe. Ifwe tekuti tucipange icapusanako.

⁶⁶ Mailo, kunuma kulubansa ulwa—ulwa kwa nkashi yandi uwikala pang’anda yakonka payesu, Nkashi Woods, twalemona tandabube iyapangilwe pa cimuti. Kabili umwela waleipupa kunuma na kuntanshi. Kabili alelanda, ukutila, mu Mimana Ya Mu Fiswebebe, Ndecetekela, alebelenga ifyalembwa pamutiti mukati ka tandabube. Kena ka mutiti akanono akaya mulya nokupanga icipapa icinono icakukacingilila, ukukasunga munshita yamupepo. Kabili, lelo ilyo yaisa inshita . . .

⁶⁷ Uyu muntu uwalebomba nakalya kantu akanono, bamwene kamutiti muli tandabube kalesela nokulaiyonga. Kabili balikomfwileko uluse nganshi, eico batontonkenye ukutila baputulekofye kumpela kabili nokuleka akashishi kanono kafume. Pantu, lintu kafuma mulya, kali nokukwata amapindo. Kaingile nga kashishi nangu akamutiti akanono, kafuma namapindo, mumibele imo iyabukata. Kabili ilyo kaleinyonga, nokutinta, nokwikata, nokuma, nokusuma, nokweshwa ukufuma muli tandabube, balikomfwilako uluse. Eico bamwene ukutila balakapela inshila iipi, eico babulile sisala nokuputulako kumpela. Kabili ilyo baputwilweko impela, kalya kashishi kalifumine. Lelo kena takatalile ba bwino, pantu takakwete

amaka nangu yamo mumubili wakako. Takwete nangu... Kafililwe ukubomfya amapindo yakako.

⁶⁸ Kabili Ndetontonkanya enshila twaesha ukubwekeshapo, ukutula, “Isa ku cipailo!” Kabili—kabili ukulanda *ici, ico, nangu cilya*, kabili nokwesha ukubwekesho abantu kuli Lesa, nangu mu chalichi, nangu ukwisa kuli Kristu. Kubalekafye bafumamo na boo-hoo. Ifyo efyo. Kubombafye ukufuma kobe. Epela fye. Nga mwaesha ukubapela inshila iipi, bena tekuti beminine. Mfwayafye ukubamona balelwisha nokubomba pali ico mpaka Lesa abapela Ukufyalwa ukutuntulu, munshila yacifyalilwa, bapelenifye Ukufyalwa ukutuntulu. Fye. . .

Abantu batila, “Ukuba, wemutemwikwa, Ndetontonkanya walipepa ukufikapo.”

⁶⁹ Imwe ikalenifye palya mpaka mwaba abaiteyanya ukupupuka. Ico e cintu fye ceka. Lesa alikwata inshila yakucicitilamo ico.

⁷⁰ “Oh, ukuba, ngacakutula ulefwaya ukuba umusuma, kabiye fye nokuya yampanya ku chalichi. Bamayo baile ku chalichi cimo cine.”

⁷¹ Ico kuti cabafye bwino. Lelo, namwishiba, cisenda imfwa pakuleta umweo. Kabili tulingile ukufwa, mpaka, lyena, twaba abafwa nganshi icakuti u Mweo upya waisamo. Nomba amapindo yesu yakaba ayauma umutengo; kabili necakupitamo—cesu, ico twakwata, cikaba icakunonsha kuli bambi nakuli ifwe fwebene.

⁷² Israele tali uwaiteyanya. Lelo Lesa ali uwaiteyanya. Kabili Alikwete akanya akanono akafyelwe, akeshina lyakwa Mose. Kabili ali palya pene ne myaka amakumi yane, ukuti afumye abana, lelo Israele tali uwaiteyanya. Napamulandu wakutula tabali abaiteyana, eeico bali nokubomba pamyaka amakumi yabili ukulundapo, nangu imyaka amakumi yane ukulundapo, efyo cali. Imyaka amakumi yane kuntanshi, bali noku—nokubombesha, mulya mu Egypto. Ilyo, bena nga balifumine, imyaka amakumi yane ilyo cilya tacilabako, nga bena balifye abaiteyanya.

⁷³ Lesa ali uwaiteyanya, pantu inshita ya bulayo yalipaleme. Lesa atumine Malaika ukwisa pe sonde, mukupekanya abantu, ukufikilisha i Cebo Cakwe, pantu Lesa lyonse alasunga i Cebo Cakwe. Atile kuli Mose, “Nimona ukucushiwa ukwa bantu Bandi, kabili Nalyumfwa ukuteta kwabo nokulila kwabo pamulandu wabalebabomfya. Kabili Ninjibukisha. Ninjibukisha i Cebo Candi, ubulayo Bwandi.” Imyaka imyanda ine yalipitile, lelo Lesa acili aleibukisha i Cebo Cakwe.

⁷⁴ Mupepifye ne myaka amakana yabili yalipita, lelo Lesa acili aleibukisha i Cebo Cakwe. “Nkesa nakabili nokumupokelela kuli ne Mwine; ukutula uko Ndi, eko naimwe mukabe pamo.” Kabili Ndecetekela inshita ya bulayo ileya ilepalama.

⁷⁵ Moneni. Ilyo Alelanda nokuiteyanya, kabili imyaka imyanda ine yalipitile, kabili Lesa ali panshita ne Cebo Cakwe. Nomba tulesanga ukutula . . . panuma ya myaka amakumi yane kuntanshi.

⁷⁶ Kabili limbi kuti Naiminina apa ukuti nandeko aya mashiwi. Nomba kuti mwaambula amashiwi yandi pantu Ninjishiba ukutula cili nokuba pali tepu uko. Nincetekela ukutula ifwe tuli . . . Inshita ya Kwisa kwakwa Shikulu Yesu yakokola. Nincetekela cali nokuba panshita iitali iyapitapo. Lelo, ni pamulandu wa Chalichi, tacili icaipekanya uku Mukumanya.

⁷⁷ Nomba, nga kuti mwamona, Atile, “Nga fintu cali munshiku shakwa Noa.” Munshiku shakwa Noa, ilyo ilyeshi talilabako, ifyo cikaba. Kabili Lesa talefwaya ukutula uuli onse engonaika, lelo ukutula bonse bengesa mukulapila, lyena Alishipikishe panshita iitali. Icipandwa ice lyeshi cali nokucitika mushita yafumineko. Mulya mu Egypto kwali nokucitika munshita yafumineko. Bushe namucumfwa? Ukonaulwa kwanshita yelyeshi ilyo talilabako nomba; kwali nokucitika kale, ukonaulwa mubupingushi. Kabili ukufuma mu Egypto; kwali nokucitika munshita yapitile, imyaka amakumi yane ukucila panshita kwali nokucitika.

⁷⁸ Lelo Lesaa ali uwaipesha. Lesa aali uwaipesha ukutula i Cebo Cakwe tacakabwelele kuli Ena. Aali nokusunga i Cebo Cakwe. Alingile ukusunga i Cebo Cakwe. Alingile ukucita ico, pakutula engaba Lesa. Nga Alinga ukupanga u—ukucinja kwa fintu fyonse, kabili, kukusenamina Ali nokucita ico.

⁷⁹ Uyu e mulandu wine Ndetila . . . nga cakuti i Chalichi taci iteyenye Icine. Uyo mulimo wenu, ukuiteyanya. “Nabwina naiteyanya Umwine.” Imingila yalilipililwa. Bali abaipekanya, lelo mufwile ukuba abaipekanya pakufwala iyo imingila. “I Chalichi naciiteyanya Icine.”

⁸⁰ Nomba, mweba bwananyina, kutikeni. Nga cakutula i Chalichi cakana ukuipekanya, Lesa ali uwashingamwa ukubula aya amabwe nokwimyo abana kuli Abrahamu. Nga cakuti aba bantu ba mushilo tabayolwele abene, nokubwekela mucikakilo nakabili, bweleleni ku Mbila nsuma, Lesa akemya ukufuma . . . Ena kuti aleta ba Katolika, ba Presbyteriani, nangu conse ico Engafwaya ukucita. Ali nokucita ico.

⁸¹ Imilungu iinono iyapitapo, ku Lima, ku Ohio. Mwebengi, mwebekela pano nomba, mwebalipo. Pakati kaba Presbyteriani, ba Baptisti, naba Methodist, bapongolwelwe ku cipailo. Balipokelele nokwankula ku Mbila nsuma, ukucilapo, ukucilapo, inshitaishingi, pa bantu babamushilo bacita. Twacikatafye mumano yesu, ukutula twitilwa kwi Shina Lyakwe ilya mushilo, kabili twaleka caba fye ifyo fine. Calicilapo pakwitwafye Shina Lyakwe. Cilepilibula ukwikalila Ena Uyo uwamufwilile. Bumi, ubumi ubwasangululwa kuli Lesa. Oh, ifyo tukabila, ukubwekela kuli Baibele!

⁸² Kuno inshita sha bushiku ishinono ishapitapo, Nalelanda kuli ba Lutherani, uko...ku kulongana kulya lubali. Nomba bena batilefye, “Tupeniko nayambi ama colleji yasano ayaba nga ifi, aya balya ba Lutherani, pamulanu wakutila amakumi cine lubali na umo muli bena bapokelele Mupashi wa Mushilo bulya bushiku pa colleji,” lintu Nali kulya. Atile, “Tupeni nayambi amasukulu yasano ayaba nga lilya, kabili Shikulu loleleni imyaka ikumi, tuli nokwisusha chalichi cesu ica Lutherani na Mupashi wa Mushilo.” Oh, owe! Mucine.

⁸³ Lesa kuti acita, aya amabwe! Ena ali nokukwata i Chalichi icapelwa, ukwabula itolo, nangu ulukanshi, nangu icibala. Ukusenamina Kwakwe kwalilinga, kabili kuti Acita icacilapo, mukufusha.

⁸⁴ Kabili Nalilandile, kuno tapapitile inshita, ba Lutherani balikwete ulubuuto lwa musaniko kwisonde. Cinshi cacitike? Nga mwali ulubuuto lwe sonde, imwe mwebantu abena Lutherani, panshita imo, pa kulungamika ukwa ntanshi, cinshi cacitike ku lubuuto lwenu? Cinshi, calushimishe? Uyu e mulandu lwashimine, nipa mulandu wakutila mwalisha i Cebo cakwa Lesa. Mwalicetekele ukutila, “Abalungami bafwile ukwikalila ku cicetekelo,” ico icaba Icine capwililika. Lelo kwaliba icacila pali ico, “Abalungami bakekalila kucicetekelo.”

⁸⁵ Nomba kwaishile ba Methodisti. Bena, imwe mwebantu ba Methodisti, mwasendele ulubuuto lwa musaniko lwa kushishiwa, kabili mwalikete umusaniko wa lubuuto ulwa kupuputulwa ukukalamba. Ico conse cishinka. Lelo, cinshi icacitike, cinshi icacitike ku chalichi ca Methodisti? Nipamulandu wakutila mwalekele ulubuuto lwafuma. Ico ecacitike. Kabili mwashimikile ukushishiwa, umulimo wacibili uwine wine uwakusenamina, ico icaba icituntulu, Icine, ukupitila muli Baibele, lelo mufwile mwacileka capita pali ico.

⁸⁶ Kabili nomba kwaishile ba Pentecosti, nokubwekeshapo kwa fyabupe. Kabili mwalandile mundimi, kabili nomba mwapangile isambilisho ukufuma muli ico. Kabili nomba cinshi cacitike? Ulubuuto lwenu lwalishima. Bwafya nshi? Nimukutila mwalifilwa ukwikala pamo ne Cebo.

⁸⁷ I Cebo cakwa Lesa tulefungulula, kabili tufwile twafunguluka nga fintu i Cebo cakwa Lesa cifunguluka.

⁸⁸ Ilyo inshita ilefunguluka, sayansi ilefunguluka. Kabili nga cakuti isonde lya cifyalilwa...Uyu muntu muntu umo wine ali imyaka amakana mutanda iyapitapo, ilyo Lesa amupangile. Ena muntu ubomfya amano yamo yene. Ena wamano yakutontontanya yamo yene. Ena muntu fye umo wine, na mano yamo yene yasano, untu ali imyaka amakana iyapitapo. Lelo lolesheni pabuyantanshi acita mumyaka yapitapo amakumi yasano. Lolesheni ifyo ulyo mwana wakwa Lesa uwapona acita. Ena alipanga ba motoka, ne filimba, no lubuuto lwa malaiti,

na mabomba aya atomiki, nendeke ishibutukisha nganshi. Lolesheni ifyo mukwangufyanya. Amabula yalepilbulwa mukwangufyanya muli sayansi.

⁸⁹ Lelo tuleesha ukubwekela kunuma kucisumino cimo icakale icachalichi, nokwiminina palya, lintu Lesa alefwaya tufungulule i Cebo. Tuleikala mu bushiku bwakulekelesha. Tuleikala munshita iyo i Chalichi icikalamba icisuma icakwa Lesa cifwile ukwiminina pa makasa ya Ciko, tulebeka nge Tunda Iya mu Mumupoka poka.

⁹⁰ Lelo natubwela, bamo, “Ukuba, Nabakuli ba Presbyteriani, ba Methodist, ba Pentecosti. Ndi *ici*, nangu *ico*.” Oh, we musebanya we!

⁹¹ Tufwile ukulafunguluka; u Mupashi wakwa Lesa ulepongoloka. Te kamfukumfuku fye kamo akanono, te lubatisho fye lumo ulunono; lelo, ulubatisho panuma ya lubatisho! Te busokololo, “abalungami bakekalilafye ku cicetekelo,” nangu, “ukushishiwa,” nangu, “ifyabupe fya Mupashi.” Lelo, ubusokololo panuma ya busokololo, amaka panuma ya maka, ubukata panuma ya bukata! Mulandu nshi, tufwile twaba pamulu nganshi pamusebo, abaipekanya ukucinjishiwa. Kabili tuleshalila kunuma ukubwelela mufintu ifyakale, nokutula, “Ukuba?” Twaikalila ukubwekelamo. Natuye kuntanshi!

⁹² Balya aba Hebere batile, “Nomba, pano, balatulisha bwino nganshi, nangu tubombesha. Kabili nomba twalikwata ifintu ifyo twakwata, twalikwata impoto sha galiki, nafimbipo, eico lekeni tube abaikushiwa.”

⁹³ Lelo, Mose alikwete ubusokololo. Ena ali mu Kubapo kwakwa Lesa. Ena alikwete icintu cimbi. Alibwelelemo no kubalangisha ukutula Lesa wine uyo uwalipo imyaka imyanda ingi ilyo takulaba ico, aali fye ni Lesa umo wine. Kabili Acitile ifishibilo ne fisungusho kucinso cabo, ukushininkisha ukutula Aali ni Lesa umo wine.

⁹⁴ Oh, lipalwe i Shina Lyakwe! “Ena aba cimo cine mailo, ileelo, no muyayaya.” Inshita shilacinja, inshita shilacinja, abantu balacinja. Lelo, Lesa alashala. Afwile aba cimo cine, inshita shonse. I Cebo Cakwe e Cine ica Muyayaya. Tekuti apusanako kuli Cena, ukufuma kukulyo nangu kukuso. Afwile aba cimo cine.

⁹⁵ Nomba twasanga icilecitika. Mose aisa, ne fishibilo. “Nali mu Kubapo kwa kwa Lesa. Nalimona Lesa, kabili Lesa alicita ifintu ifikalamba.” Abombele umulimo wabundapishi ubwamaka yakwa Lesa. Alicitile icintu nacimbi, nge cisungusho. Kabili alibalangishe ukutula Lesa wine uwa ku Muulu alimonekele kuli ena. Panuma yamyaka imyanda yacakupapusha ukuya, alangishe ukutula Lesa acili uwamweo.

⁹⁶ Kabili Lesa alimutumine, nokutila, “Kabiye ubebe ukutila ‘NABA’ nantuma.” Te “Nali” nangu “Nkaba.” “NABA,” inshita ilipo nomba! Ena te “Nali.”

⁹⁷ Ifyo abantu bengalanda ukutila Lesa, nokutila, “Inshiku shafisungusho shalipita, kabili ukundapwa kwamaka yakwa Lesa na mapalo yonse yaliya,” kabili nalyo line ukusosa, “Ena ni Lesa uwa mweo, kabili NABA”? Nga cakutila Ena aali “NABA,” Ena abafye uwacine nga fintu Ali pacimpusa icalopya.

⁹⁸ Lilya i Shina ilikalamba ilyo Amonekelemo kulya, tapaba kasambilila ukufika pali nomba uwakwanisha ukulipilibula, J-v-h-u. Tapaba nangu umo. . . Bena balita “Yehova,” lelo cena tacali ifyo. Tapaba nangu umo uwingapilibula ico.

⁹⁹ Mulandu nshi? Ni Umo uwa Muyayaya. Amen. Ekala mu Lubuuto. Ekala mu Muyayaya. Ekala mucishifwa; umuyayaya “NABA.” Alleluya!

¹⁰⁰ Iicetekelo candi caiklala pa Cilibwe cakosa. Tapaba icintu icingaleta ubusanso ilyo ubikile inanga ku Ncende. Imfula ya fipupu kuti yacisunkanya nokucuma, lelo inanga yandi yaikata mukati kacifimbo. Ilyo umwaume nangu umwanakashi aikata nokucisumina, takuli nangu cimo icingamusunkanya ukufuma kuli cena.

¹⁰¹ Pamofye nga fintu inshita yabo yali iyakulubulwa, kabili bafililwe ukumona ico, efyaba nenshita yakulubulwa, amalamuno yakutampa ukwenda aya Chalichi. Naifika.

¹⁰² Lolesha, cibusa wandi. Bakwete cinshi? Intanshi, i Cebo. Ica cibili, kasesema. Ica citatu, Malaika ukubatungulula, ukubatungulula. Cila umo asuminishenye no mubiye; batatu pali bena. I Cebo casuminishenye pamo na kasesema; kabili na kasesema asuminishenye pamo ne Cebo; Malaika asuminishenye nabonse batatu, bonse. I Cebo; kasesema; Malaika! Bali abaipekanya ukwenda.

¹⁰³ Oh, lipalwe i Shina lyakwa Shikulu Lesa! Ifwe tuli panshita yampela; i Cebo, kasesema, na Malaika, bonse batatu capamo, ubunte bumu ubukalamba. Lesa lyonse atila, “Mukanwa ka nte shibili nangu shitatu, lekeni icebo conse cipampamikwe.” Kabili kasesema uwa cine lyonse ali nokusuminishanya ne Cebo; kabili Malaika uuli onse akapela ubunte bwa Cine. Amen. Natuipekanya pafyo twaebwa ifyakwenda. Mucine.

¹⁰⁴ Kabili Aumishe abantu. Pabulendo bwabo ubwakuya, batampile ukulwisha kasesema, nokulwisha Malaika, nokulwisha Lesa, nokulwisha i Cebo. Kabili baishileba mubwafya. Baibele itila, “Kwaliko ibumba ilyasankanishiwa ilyaile pamo nabo.” Ibumba ilyasankanishiwa lyalifumine.

¹⁰⁵ Cali ni cinshi? Ica kupapusha calicitilwe. Kwaliko ifisungusho ne fipapwa. Umuntu onse, umuntunse, akabila ukumona kunuma ya cipembe uko afumine, kabili kuntu akaya

ubushiku bumo. Akabila ukumona kunuma ya cipembe. Lelo, inshita ishingi, ilyo imilimo yakupapusha yacitwa, lyena kulaba ibumba ilyasankanishiwa iliya.

¹⁰⁶ Ico ecacitike munshiku shakwa Luther. Lintu ukusakana... Lesa alesha ukubafumya ukufuma bulya bushiku. Kabili munshiku shakwa Luther, “Abalungami bakekalila kucicetekelo.” Balyeshe ico, kabili balyeshe ico, kabili basangile ukuti cali ifyo fine. Abacintobe ntobe baile. Kabili lilya linefye Luther aile, cinshi cacitike? Bapangile ichalichi ukuba akabungwe no kupanga imibombele iikalamba iikulu iyabuka pepa. Kabili ilyo bacitile ico, ichalichi cabwelelemo pa shelufu.

¹⁰⁷ John Wesley alishile, umo umukalamba, uwabulwi uwabulamba uwamunkulo ya pakati. Kabili alifumine nokukana ifipope fya chalichi ca Anglicani, nokukana ifipope fya chalichi ca Katolika, kabili akene nefyo isonde lyalelanda, ukutila, “Lesu uwa mushilo atile, ‘Abantu balingile ukwikala aba mushilo!’” Kabili aikele pa bulayo Bwakwe, pa bulayo bwakwa Lesa, kabili aletele icisungusho. Cinshi cacitike? Ba cintobe ntobe batampile pamo na ena. Kabili lintu Wesley aile, ba cintobe ntobe baishile ingilamo. Kabili cinshi ico bacita? Balyonaula ichalichi, mpaka abengi muli bena tabakakwate ne nyimbo sha “Mulopa” mu mabuuku yabo aya nyimbo. Mucine.

¹⁰⁸ Ukuba, panuma yaico kwaishile ba Pentecosti, naba Pentecosti batampile ukufwaya ifyabupe. Lilya line fye bafikile kufya bupe, icintu ca ntanshi...Ica bupe icacepeshapo mwibumba lyonse caba “ukulandila mundimi.” Ico e cakulekelesha kabili icacepesha. Lesa atampilepo ukubapela ifinono, kabili bafililwe ukwikatilila ico.

¹⁰⁹ Lolesheni kuno. Icabupe ca ntanshi, mu mulpango wa fya bupe, caba mano; ica cibili caba ukwishiba. Kabili nga twakwata amano nangu yamo, kuti waishiba shani ifyakucita nokwishiba? Fwaya ifintu ifisuma mukubalilapo, amano. Kabili nga tawakwata amano, nicinshi ico wingacita nokwishiba, nangu ukulandila mundimi, nangu ifi fintu fimbi? Cisenda amano. Cisenda *amano* yakwa Lesa. Solomononi atile, “Cite ico banoko.” Cisuma.

¹¹⁰ Lelo ni cinshi ico bacitile? Ba Pentecosti bapokelelele ukulandila mundimi, kabili bapangile icilonganino ukufuma muli ico. Kabili balile, batile, “Ici Eco.” Mucine, balicitile ico. Kabili ibumba ilyasankanishiwa lyaila pamo nabo.

¹¹¹ Kabili, ileelo, cinshi icacitika pamo naba Pentecosti? Kwaba amabumba yabili ayabo. Limo pali bena lyaba ilyatalala, nelyakukonka ifyatantikwa, ili shingalulwa, nga fintu bengaba. Kabili nalimbi likonka icisakatu camasambililo; ukufumya amafuta nomulopa pamaboko yabo, nefintu fyonse ifyashala, mucalo monse, nokucita icishibilo ca Mupashi wa Mushilo; na

bacula, naba malinso, nefintu, ukulatoloka ukufuma mu bantu, nomba nokucibika mu bwalwa, nafimbipo. Uuli onse alishiba ukutula ciwa takwata umubili wa buntunse.

¹¹² Kabili ngo Mulopa wakwa Yesu Kristu waponene pa muntu, cena cali mubili wa buntunse, ukutula Kristu alisa kale; kabili cena cilubo, ninshi.

¹¹³ Baibele itila, ilyo Yesu akesa, ukutula, “Ikufi lyonse likafukama, kabili ululimi lonse lukalumbula.” Ena akaba... “Ukwisa Kwakwe kukaba ngo lubuuto ulo luleisa ukufuma ku kabanga ukuya ku mboshi, efyo ukwisa kwa Mwana wa muntu kukaba. Ikufi lyonse likafukama, kabili ululimi lonse lukalumbula.” Ifwe twalishiba ukutula ico cishinka.

¹¹⁴ Lyena, ilyo twamona filye fintu ukucitika, ilyo twamona filye fintu ukufikilishiwa, lyena tuleshiba ukutula kuli bacintobe ntobe abaingile pamo nabantu. Panuma yakashita ibumba ilinono limo liya kulya kulubali lumo, limbi liya kulya kulubali lumbi. Kabili apo epali bacintobe ntobe benu. Apo epali efyo mwacita palwa ico nakabili. Apo muleisa.

¹¹⁵ Kabili ilyo cacitile ngefyo, bena baishile ku cifulo ca Kadesh-barnea. Kabili ilyo baishile pa Kadesh-barnea, ico cali cipuna cabupingushi apo ukweshiwa kufwile kwapwila.

¹¹⁶ Oh, nga kuti mwacumfwafye cena, mwe chalichi cinono! Nomba pano epo tulefwaya ukufina pakashita fye. Nomba kutikisheni. Kadesh-barnea yali ninshita yakweshiwa. Kabili umwana onse uwaisa kuli Lesa afwile aeshiwa. Takwaba ifyakufumyako, nakalya. Lesa alesha no kwesha umwana onse uyo wisa kuli Ena. Bushe ico nacilungama? Baibele yalanda ukutula bena efyo baba. Kabili, ngefyo, tulemona nomba ilyo yalya amesho yaisa, nokweshiwa.

¹¹⁷ Kwaliba inshita sha kweshiwa ishisa kufyalo. Nomba, Ndelanda ici, Nshili uwafikansa fyacalo. Lesa alatungulula icalo Cakwe umwine. Teutungulula ifyo fyalo; Ciwa eufitungulula. Cila cimo iya fyena, Baibele itila filacita ico. Ciwa eutungulula icalo conse. Moneni lintu inshita yakweshiwa yaisa iyafyalo.

¹¹⁸ Lintu inshita yakweshiwa yaishile kuli Israele ena alifililwe. Kabili, lintu acitile ico, Lesa amutwele ku Babyroni. Nge calo, alifililwe.

Kabili ilyo inshita ya kweshiwa yaishile kuli Rome, ena alifililwe.

Ilyo inshita ya kweshiwa yaishile ku Greece, alifililwe.

Lintu inshita yakweshiwa yaishile ku France, ena afililwe.

Ilyo inshita ya kweshiwa yaishile kuli Russia, ena alifililwe.

¹¹⁹ Umfweni. Kabili Ndelanda ici no mutima wa mucinshi kuli Lesa. Inshita ya kweshiwa yalisa iyakwa America, kabili alifilwa. I Mbila nsuma yalishimikilwa ukufuma ku

kabanga ukuya ku mboshi, ukufuma kukapinda ka kukulyo ukuya kukapinda ka kukuso. Balipita muncende iinono yonse, nemilepulwa necifutu. Ukupuputulwa ukukalamba kwalicitika, Billy Graham na Jack Schuler, na Oral Robert. Kabili bali, oh, imyanda iyabena, balipita mumulepulwa onse namucifutu. Ciwa aliposelepo icitunshi tunshi kulya, kabili nomba Lesa alibombebele ukufumya abaume ku citunshi tunshi; kabili onse cakolwa mucikulwa ca bwalwa, nangu konse uko engaba, akeminina ukwabula icakufisamamo. Ee, mukwai. Inshita ya kweshiwa naisa. Cinshi ico Namwebele ukufuma pali cino cintamba? “Umwaka wapwile, America apangile icilubo cakwe icabipisha.” Natile, “Icilubo icabipisha!” Mucine alicitile ico.

¹²⁰ Kabili moneni efyo alecita nomba. Mulacimona mumibombebele yabuteko. Bena baleesha ukuya kulya nokwampana naba Mucime. Bushe tamwaishiba? I Cebo cakwa Lesa catile, “Onse uyo uwatipa Israele ali nokutipwa.” Icline cine.

¹²¹ Naiminina na Israele. “Senda icifulo cesu? Bena bakacisenda.” Mucine.

¹²² Balecita icintu icalubana. Mucine, efyo baba. Munyina, lolesha kucalo conse icalelwisha aba Yuda; balibile. Lolesha pali—lolesha pali Gelemanu ilyo alwishishee aba Yuda, kabili baocele imibili mumalungu yamulilo ayamalaiti; kabili mona efyo caba ileelo. Lolesha pali Italy, uyo uwalwishishe aba Yuda, lintu Mussolini abatamfishe ukufuma ku Italy; lolesha pali ena ileelo. Atubula ukulabalisha, nga balifwa kunsala.

¹²³ Kabili apa i Mbila nsuma yalishile nokupela ubwite bwaluse mufyalo, pamyaka, kabili twalibukana. Kabili nomba alebomba, ciwa ali pa cipuna cakwe, alebwesha imitima ya aba bantu ba fikansa fyacalo kuli Israele, kabili bena baleampana kulya naba Mucime. Munyina, ifyo cimo cine nokuya. Ico nacilungama. Tukabunda, pamofye nesonde.

¹²⁴ Nalitemwa icalo candi. Nalitemwa, ifyo caimininapo. Lelo, munyina, Nalitemwa Shikulu wandi ukucila ifintu fyonse. Kabili Nalitemwa ukumona icalo candi pamakufi yaciko, lelo Naliba nomwenso ukutila tatwakatalecita ico. Tuli panshita yampela. Cinshi icacitike? Ibumba lyabucintobe ntobe lyaishilemo.

¹²⁵ Lolesheni pama chalichi yesu, imyaka iinono iyapitapo, lintu bakwete ama chalichi yakale aya bumushilo, ilyo bena baiminine pali Lesa kabili abalungami, ilyo abanakashi bafwele nokucita nga banamayo, ilyo abaume bafwele nokucita nga baume, ilyo abantu baleya ku chalichi pa Mulungu ulucelo, ilyo bakwete ukulongana kwamapepo ukwakucesha ubushiku, ilyo bakwete icipasho ica nshita yakale. Balikwete ukupuputulwa ukwine kwine. Lesa alipalile. Aliputwile umulwani onse pacinso cabo. Baletwalililapo ukwenda. Lelo ilyo icela cakwa Akani caingile

munkambi, takwali icasheleko lelo ubonaushi. Ifwe tuli pa cebo cesu, Lesa . . . pabulendo bwesu. Lesa alasunga i Cebo Cakwe.

¹²⁶ Inshita ya kweshiwa yalisa. Inshita ya kweshiwa yalisa iya chalichi ca Lutherani. Inshita ya kweshiwa yalisa iya chalichi ca Methodisti. Inshita ya kweshiwa yalisa iya chalichi ca Pentecosti. Kwena kwishila ichalichi conse. Kwena kwishila umuntu onse. Inshita ya kweshiwa.

¹²⁷ Kabili kwaba fye inshila imo iyo mwingatala ishiba ukutula muli abalungama: ikaleni na mafunde yakwa Lesa aya Muyayaya. Ikaleni ne Cebo. Ifyo Lesa alanda, landeni, “Ico nacilungama.” Mwisenda icacepapo nangu icakucilapoi. Cinshi ico twingakwatila ifyakupyanishapo pali *ici*, *ico*, kabili *cilya*, *ilyo* i Cebo cakwa Lesa caisulamo ubulayo? Ee, mukwai. Tatulingile ukusenda ifyakupyanishapo ifili fyonse. *Ici* Cishinka. Lesa alasunga i Cebo Cakwe. Te mulandu ifyo Cingamoneka icabulamo amano, Lesa alasunga i Cebo Cakwe, nangu cibe ifyo. Ena mucine alicitile ico.

¹²⁸ Bushe bawisokulu nga balandile cinshi nga cakuti bawiso bafyala basokulu babebele uktila kukesa inshita ilyo ifikoci fikapita mumisebo ukwabula bakabalwe? Bena nga balibasekele, nalimo. Lelo, fyena fili muno. Cisuma.

¹²⁹ Nga palwa ifi fintu fimbi ifyo fili nokucitika, ilyo bonse ubu busesemo ubukalamba bwacitwa? Lelo, ifwe tuli pano.

¹³⁰ Kabili ubushiku bumo Yesu ali nokwisa, ubo ubwa bukata ubukalamba ubwa Mwana wakwa Lesa. Alaile ukutula Ali nokucita ico. Alilaile ukutula Akapingula ulubembu. Munyina, uli nokupokelela ilambo ilyapelwa na Lesa pa lubembu, nangu ukeminina weka mu Bupingushi; icalo, ichalichi, nangu umuntu umo. Inshita yakweshiwa!

¹³¹ Mona, batumine umuntu umo ukuya, bali ikumi limo na babili, ukufwailisha fintu bengalanda. Ikumi pali bena babwelele, batile, “Oh, ifwe tekuti tucite ico! Cena tacingacitwa. Ifwe tekutifye tucite.”

¹³² Lelo Kalebu na Yoshua balininine pa cishiki, batile, “Ifwe kuti twacitita. Ifwe kuti twacitita.”

¹³³ Mulandu nshi? Cena cibafye paco uleloleshapo. Ngacakutula ulelolesha panse, “Bushe cilemoneka muli iyi nshila? Bushe cilemoneka . . .” Taufwile ukulolesha paco abantu balanda, nangu ico icintu conse cimbi cingalanda. Nga cakutula cena cintu capusana ku Cebo cakwa Lesa, ikala ne Cebo.

¹³⁴ Lesa abalaile cilya icalo. Ico eco Kalebu nabonse balebikapo isubilo lyabo.

¹³⁵ Belengeni Ibuuku lya Malango, moneni ifyo Mose alebalungamika. Atile, “Nalicita *ici*, kabili Nalicita *ico*. Kabili Lesa acitile *ici*, kabili alandile *ici*. Lelo iwe walikene.” Lesa ekala no bulayo Bwakwe.

136 Oh, inshita shimo cimoneka kwati calikosa. Nomba, Ndefwaya imwe ukumfwa kuli ici. Cena calikosa...Bwena bulwi.

137 Mulya mu Egypto, Lesa atile, “Nimupela ilya mpanga, nafyonse ifyaba muli yena.” Nomba, Ena talandilefye ukutula, “Ndi nokumwimya, nokumutwala kulya nokumwikalika panshi.” Bena balwilile iciputulwa conse ica mushili ico bakwete.

138 Lesa, lintu Aebele Yoshua palya, Atile, “Mube nokushipa; mwitina, nangula ukuba abasakamana: pantu Yehova Lesa obe ali naiwe konse uko uleya.”

139 “Shikulu Lesa obe ali naiwe konse uko uleya.” Temulandu fintu cingaba, ifyo cakosa, ifyo icakucilinganya cikulile, ico tacilesakamika. Nga kupita mumupokapoka wa cinshingwa camfwa, “Shikulu Lesa wenu ali naiwe konse uko uleya.”

140 Oh, ifyo Yoshua engeta Israele capamo, nokutula, “Iminineni pano nokumona ubukata bwakwa Lesa.” Lesa ali pamo ne Cebo Cakwe. Lesa alipangile ubulayo. Lesa atile kuli Yoshua, “Yonse incende iyo ututende twamakasa yobe twanyantapo, iyo yobe. Ndi nokukupela.” Amen.

141 Nga kwepusukilo, nga kundapwa kwa maka yakwa Lesa, nga kwa mapalo ayengi, nga cena ca...?...nga cena ca cintu icili conse ico Lesa alaile, panga ifishilwa fya nkasa! Amen. “Incende yonse iyo akatende kamakasa yobe kayantapo, iyo Ninkupela ukuba icikwatwa cobe.” Lesa alilaile ico. Lesa alasunga i Cebo Cakwe. I Cebo cakwa Lesa cacine muyayaya. Nalicetekela Ici. Naucetekela Ici. Bamunyina, yena ninshita yesu iyakupanga ifishilwa fya makasa. Tekuti twikale muno muli iyi nkambi imo ine. Umulilo uletwalilila ukuya. Leken tusele, ukufuma ku bukata ukuya ku bukata, ukufuma kucakupitamo ca mu Baibele ukwisa kucakupitamo icamu Baibele. Leken tufunguluke nokwisula imitima yesu, ukwimyako amaboko yesu kuli Lesa. uKuba namano ayabuntu; ikaleni muli Baibele. Mwiesha ukufuma muli Ico. Ikaleni Apo pene.

142 Konkeni! Twalikwata Kasesema wakwa Lesa; twalikwata i Cebo cakwa Lesa; kabili twalikwata Malaika wakwa Lesa. Ena aletungulula ici Chalichi nga fintu fye Atungulwile muli shilya nshiku. Ico nacilungama nganshi. I Cebo cakwa Lesa cili kuntanshi yesu; Kasesema wakwa Lesa e Mupashi wa Mushilo; Malaika wakwa Lesa aletungulula i Chalichi. Tuleendela mu Ntumba ya Mulilo, mu Bukata bwakwa Lesa, “Twikele capamo muncende shamu Myulu muli Kristu Yesu.” “Nomba tuli bana baume na bana banakashi abakwa Lesa.” Kabili ubusokololo ubukalamba ubwa Cebo, Mupashi wa Mushilo aleibisha Ico mu mitima, nokuleta ifimuti fye pusukilo, ukwikala kwalungama, ukutemwa, ukusangalala, umutende, ukutekanya, ubusuma, ukunakilila, ukushipikisha. Mucine efyo caba!

¹⁵⁰ “Ine, Shikulu, nali Cibyala; Nkala Citapilisha akasuba no bushiku,” Atile, “epali bamo ba Cifumya mukuboko Kwandi.”

¹⁵¹ Kuti camoneka kwati cileibila, lelo tacakatale acibila. Oh, bulya ubwato ubunono ubwakale mulya munshita yabushiku, lintu isubilo lyonse lyapwile, kabili ena ali uwakuposwa uku noku, camoneke kwati ora yakulekelesha yalifikile. Lelo, pamuku fye umo, Umuntu umo aishile aleenda pa menshi, kwalifye tondolo. Ena lyonse alabapo. Tacelwa. Ukupumwa nakumbi kabili nobwato nga bwalibundile. Lelo Ena lyonse alabapo. Mucine.

¹⁵² Bulya bushiku, mulya mu Babyloni, lintu abana baba Hebere baendele muli lilya ilungu lya mulilo, camoneke kwati impela yalifikile. Lelo, lintu baingile mukati, “kwali Umo uwaba ngo Mwana wakwa Lesa,” aiminine pamo nabena. Ena lyonse alabapo. Tacelwa. Alasunga i Cebo Cakwe. “Nkaba naimwe.”

¹⁵³ “Ee, nangula nyende mu mupokapoka wa kufita kwa mfwa, Nshakatine ububi,” eflyo Davidi alandile. Ena lyonse alabapo.

¹⁵⁴ Alasunga ubulayo Bwakwe. Ena wa Muyayaya, Wacishinka. Tekuti afilwe. I Cebo Cakwe tekuti cofilwe. “Imyulu ne sonde fikapita, lelo Ifyebo Fyandi tafyakapite.”

¹⁵⁵ Paulo atile, inshita imo, alekwata u—u ubulwi. Ali mulya mufishi kabili akwete impepo. Ali mupepi naba mailoshi umwanda ukufuma kuli dokota. Mulya mumateshi, na mumateshi, nempepo iikalamba yalimusendele; kabili iyo yali nimfwa yakupumikisha. Kabili bwaishileila. Kabili aebele umunono, umukashi wakwe uwacishinka, atile, “Iminina mupepi naine, wemutemwikwa, kabili upepe. Kuleya kulefita nganshi mu muputule, lelo,” atile, “Ndecetekela Lesa. Kabili Nshilesakamana pacalacitika. Ndecetekela Lesa. Ndi nokwikala fye naco.” Atile, “Wikale pano nokupepa, we mutemwikwa.” Kabili alipepele. Kabili kwaile kulefitilako, atile, “Wemutemwikwa, mumuputule muleya mulefitilako. Lelo, oh Ndeumfwa umutende.”

¹⁵⁶ Kabili panuma yakashita, kwaishilefita nganshi, afwile umutombo. Aingile muciloto. Atontonkenye ukutula alelota. Abwelele ku Oregon, uko afumine, aleputula imbao. Kabili nomukalamba wancito atiile, “Paul, kabiye pamulu wa lupili palya, nokumputwilako icimuti, ama inchi *yakuti*, amafiti *yakuti* ubutali, nokucileta kuli ine.”

Atile, “Cisuma, mukwai. Ndi nokucita ico.”

¹⁵⁷ Aninike palya, nokutema icimuti cakwe, nokukomamo isembe muli cena, akonteme ukuti acisende, kabili afililwe ukucimya. Ena fye...Atile, “Nshikwete amaka. Tekuti ntwalililepo. Nshikwete amaka. Mulandu nshi,” atile, “Ine pano, umuntu umukalamba. Neufina ukucila pamapaundi imyanda ibili. Nalikwata babombwe abakalamba, kunuma. Mulandu nshi,” atile, “Nalepantawila fye amakufi yandi

capamo, nokwikata icimuti cabukulu bonse, kabili nalecimya nokubikako iminyololo pesamba lyaciko.” Atile, “Kabili pano, ico Ine . . . umusambo uunono, taucilile pali ico, kabili Nimfilwa ukucimya.” Atile, “Nalyendawike kabili Nalyeseshe, mpaka amaka yandi yonse yapwa. Oh,” atile. “Nomba Natontonkenye ukutila, ‘Nicinshi ico Ningacita?’” Atile, “Nalikele panshi no kushintilila ku cimuti.” Atile, “Oh, Ndi nobulanda nganshi. Abakalamba bancito bandi balefwaya aka kamuti akanono kulya, kabili Nshili mwaume uwalinga ukucitwala.”

¹⁵⁸ Oh, ifyo Umukalamba wesu afwaya! Alefwaya i Chalichi icabula itoni, ukwabula ulukanshi. Afwaya ibumba lya bantu ilyasambwa no Mulopa. Afwaya abantu ababa necicetekelo, abo abali nokwiminina pa Cebo Cakwe nokutila, “Ico e Cine ica Muyayaya icakwa Lesa. Cena candi kabili Nincetekela Ici.”

¹⁵⁹ Kabili atile, ilyo aikele palya, ena ashintilile ku cimuti, kabili alelila. Kabili atile aumfwile umukalamba wancito wakwe alelanda, kabili atile, “Paul?”

¹⁶⁰ Kabili atile, “Ee, mukwai, Ndi pano. Lelo Nshikwete amaka nangu yanono. Ine tekuti ntwalililepo. Ninjesha ukucita ico, kabili Ninjesha ukukunakila nokucita ifyo ulandile ukucita, lelo Nimfilwa ukufumya ici cintu panshi.” Atile, “Nindwisha. Ninjesha. Nincita ifintu fyonse.”

¹⁶¹ Kabili Ndeingililamofye nga cakuti iyi temibele yabakashimikila abasuma abamitima yacishinka ileelo, abakabila ukumona i Chalichi caculwa ukwabula itoni nangu ulukanshi, ukumona ubulayo bwakwa Lesa bwacitika. Twalilwisha nokweshwa, nopunda nokulila, nokushimikila mpaka amashiwi yakoma, kabili twalilambala pamisamino nokulila. “O mwe Lesa, mulandu nshi cabela ifi, lintu ifwe twalungamikwa, kabili mwaisa ciwa, nokuposha nokulepaula, aponyafye fyonse ifyo twakwata? Nicinshi ico twingacita ilyo twamona abantu besu abasuma, kabili ifyo basalanganishiwa nokuya ngefyo?”

¹⁶² Nomba atile, ilyo aumfwile ishiwi lyakwe, ilya mukalamba wancito wakwe, atontonkenye ukutila, “Ico cileumfwika iceni. Nshatala umfwa ishiwi lyandi ukulanda . . . ulya mukalamba ukulanda uwanakilila nganshi kuli ine.”

¹⁶³ Kabili atile, “Ilyo Napilibwike, cali Mukalamba wancito wandi umwine mwine. Cali ni Shikulu wandi, Kapususha wandi.”

¹⁶⁴ Atile, “Paul, iwe uleilwishafye wemwine ukufika kumfwa. Ico tacakakucitile icisuma icili conse.” Atile, “Paul, bushe taulemona ulyo mulonga unono uwamenshi uulepoma kulya?”

Atile, “Ee.”

¹⁶⁵ Atile, “Bikafye icintu mulya. Kabiye pali cena nokuninapo uye kunkambi. Wena ulola ku nkambi.”

¹⁶⁶ Atile, “Nalitolweke nokukunkulusha umulando, nokutolokelapo pa mulando. Napitile pamukuku, ndepunda apapela ishiwi lyandi, ndepunda, ‘Nininapo! Nininapo! Nininapo!’”

¹⁶⁷ Kabili ilintu abwelele mu buntu, aali pakati panshi. Kabili umukashi wakwe alepunda pamulu weshiwi lyakwe. Aali pakati panshi, aletila, “Nininapo! Nininapo! Nininapo!”

¹⁶⁸ Kabili, munyina, nkashi, Ninjishiba amesho yalikosa. Ndeya ndekota, kabili Nalishimikila. Nalicita ifintu fyonse ifyo Naishiba ukucita. Ningile ukuya kucifulo, uko Ndemona tekuti Ncite nakabili. Nabikafye icintu conse pamolu yakwa Shikulu Yesu, kabili Ninina pali cena. Ninina pa bulayo bwakwa Lesa, “Ine ne Shikulu nali Cibyala. Nda Citapilisha, akasuba no bushiku, epali bamo ba Ci nukula ku kuboko Kwandi.” I Chalichi cakwa Lesa cikashipikisha inshiku pe.

¹⁶⁹ I Cebo cakwa Lesa cikeminina, icalungama nganshi, inshiku pe. Kabili te mulandu nga cakutula ubufumu bwaisa, nangu amabomba aya atomiki yapona, nangu America yabwelela numa, icili conse icicitika, *Ici* e Cebo Cakwe. Ala Cisunga. Kabili Ndenina pali Cena. Nali Cicetekela nomutima wandi onse.

Natupepe.

¹⁷⁰ Mwe Yesu uwapalwa, oh, we kunina we! Ukupita pamukuku wansansa, ukupita pamabimbi ya alleluya, oh, nininapofye! Mwaililaile. Ubulayo bwenu bonse bwacine. Kabili twalishiba ukutila cila bumo ubwa bwena bulapela bukambone ukutila bwacine. Kabili ukupita munkulo, twalimona iyapalwa iyakale Baibele ilefunguluka kuli ifwe, kabili nomba inshita iikalamba ilepalama, ora iyapakati ka bushiku.

¹⁷¹ Shikulu, abakalamba, bakapyunga aba mushilo aba Mbila nsuma baliya ukupita mucalo, baleshimikila, balelila, balenwa amenshi yakumisambo, balepakaswa, balebutuka ukufuma kunceshi ukuya kufipilala, ukubutuka ukufuma mumisumba, ukubakaka, ukubapumya, ukubatumfya, ukusekwa, ukwikala nensala.

¹⁷² Lelo, i Chalichi calitwalililapo ukuya pantanshi, pantu i Cebo Cenu catila, “Pali ili ilibwe, Ndi nokukula i Chalichi Candi, kabili ne mpongolo sha kumbo tashakacanshe Cena.” Kabili ifwe tulenina pali cena, ileelo, Icilibwe, ica Muyayaya icakwa Lesa, Icine icasokololwa icakwa Shikulu Yesu Kristu. Pali cilya i Cilibwe icakosa, epo i Chalichi caiminina ileelo. Uushasumina ukutila Lesa eko aba, ba kommunisti, ifintu fyapano isonde, fyalima, kabili filapuma, kabili filapupusha. Lelo, cena cakulwa pali cilye Cilibwe icakosa.

¹⁷³ Ciwa alituma—alituma abakufwailisha imilandu. Calisentekwa. Calipakaswa. Ciletwa ifintu fyonse, mwi sonde. Kabili twaliposwa uku noku, no kweshiwa no kweshiwa, kabili, oh, ifintu fyonse. Lelo, O mwe Lesa, nga fintu Kalebu na Yoshua

abakale, ifwe tucili tulelanda ukutula natwiminina Umuyayaya pa Cebo cakwa Lesa. Alasunga ubulayo Bwakwe. Atile Ali nokucita ico, kabili natucetekela ico.

¹⁷⁴ Kabili lekeni cila muntu muno lucelo, akwate ukumona ukwapalana ukwa cilya nomba, ifyo cilepilibula, ukutula nomba—nomba ifwe tulenina pali Ici. Ubushiku bumo tukaba kulya ku nkambi, uko aba mushilo bapanga inkambi kulubali lwe sonde. Lesa nabana Bakwe bakasangalala, inshiku pe. Peleni ici, Shikulu.

¹⁷⁵ Kabili ilyo tukontamike imitwe yesu, na menso yesu ayaisalwa, muli lino ihema muno lucelo, Ndeingililamo nga, mwi Shina lyakwa Kristu, nga umo muntu kuti akwata ukushipa nokutula “Munyina Branham, buno bushiku, ino ine nshita, muli cino, Ine nomba naimya amaboko yandi kuli Kristu, nokutula, ‘Ukufuma pali buno bushiku, ukuya kuntanshi, Ndi nokunina pa Cebo Cenu, Shikulu.’ Ndi nokwiminina palya, nokupokelela Kristu ngo Mupusushi wandi; nshakeshe ukucita ifintu ifyakuti mbe uwalinga kwipusukilo lyandi. Ndi nokucetekelafye Shikulu Yesu noku Musumina. Kabili lekeni Abike kulyo kutemwa ukwashika ukwa Bulesa mu mutima wandi, kabili umutende uyo uwapula pakwiluka konse. Ndi nokulolela pa Mupashi wa Mushilo ukumpela... Nalimine, inshita imo, kabili natontonkenye kuti Nayacita ico, lelo Nalisangile ukuti tekuti Ncicite.” Mucine, tawakatale cita ico. Lelo nga uli nokwikalafye palya panshita yalinga, mpaka Acita ico, lyena cikekala apo, ninshi cakobwa.

¹⁷⁶ Lelo nga iwe waeshafye ukucicita, uli nokufilwa, kabili ulingile ukufilwa. Emulandu ukakwatila ukuya pamulu na panshi, nokwingila nokufuma, nefintu fyonse ifyo ulecita. Nipamulandu wakutula uleesha ukucita ico. Utila, “Oh, Ndecetekela Ndi fye bwino nomba.” Ico teco. Teco—cena teco. Iyo. Wena Mupashi wa Mushilo uyo wisamo. Wena ulasenda icifulo. Ulafumya imishila yonse iyakale iyabukali, ukufulwa kwakale, ne cipyu, nokalumwa, no kutemwa kwe sonde nefintu. Cifumye conse muli iwe, kabili nomba uli cibumba cipya.

¹⁷⁷ Bushe kuti waimya ukuboko kobe, nokutula, “Kristu, nengeni ukuba umwina Kristu wa musango ngoyo, muno lucelo.” Lesa akupale. Lesa akupale. Lesa akupale, namayo. Kabili Lesa akupale. Lesa akupale, munyina. Lesa akupale, nkashi. “Nengeni ukuba umwina Kristu wamusango ngoyo, muno lucelo. Ndefwaya ukuba nga Yesu. Ndefwaya imishila yonse iyabukali ukufumishiwa mu mutima wandi.”

¹⁷⁸ Nomba, kwaciba impendwa yaimwe mwebacimya ukuboko kwenu. Nomba, apo pene apo muli, nga kuti mwacita ico, nomutima wenu onse nomba, te—tekutunganyafye, lelo cetekela ukuti Yesu Kristu, u Mwana wakwa Lesa, naiminina mupepi naiwe, kabili ali nokufumyapo kulya ukukantuka kwakale pali

iwe, ukuti wingaba umuntu ulrfwaya ukuba, Ali nokucita ico apo pene apo uli. . . Ali nokukubombela mucipatala *cobe*, nga cakutla kuti wamuleka Acita ico.

Pantu ifintu fyonse filacitwa, cetekela fye.

Cetekela fye, cetekela fye,

Ifintu fyonse filacitwa, cetekela fye;

Cetekela fye. . .

¹⁷⁹ Twalililenifopfye ukupepa. Shikulu. . . Ibukisha, we mwana, mweo obe. Limbi tekuti ube mukulongana kumbi, nakalya. Uyu ewingaba uwakulekelesha. Leken i Lesa acite ico nomba.

¹⁸⁰ Watila, “Munyina Branham, bushe kuti Naisa ku cipailo?” Nga ulefwaya, mucine. Nga taulefwaya, ikala apo pene apo ubelele.

¹⁸¹ Imwe cetekeleni fye ico. “Uyo umfwa Ifyebo Fyandi, nokucetekela pali Ena uyo wa ntumine, nakwata u Mweo wa muyayaya, kabili takatale isa mu bupingushi; lelo nafuma mumfwa aingila mu Mweo.” Eifyo.

¹⁸² Nga kuti mwaatemwa ukwisa ku cipailo nokupepa, kwena nakwisulwa. Mulefwaya ukwikala apo mubelele, nokupepa; mweo wenu, nimwe mwebene.

¹⁸³ Inshita ili mupepi, munyina. I Chalichi cili fye mupepi nokupangika. Umulonga uwakale uli na matipa. Twaliposa amasumbu nokuloba kabili twaliposa ifyakwibisha ifyafyela mpaka monse mwaba umwamatipa. Muli inkumba ishingi nganshi mu matipa. Wena uli na matipa.

¹⁸⁴ Ine, ne kapyunga, Ndecumfwafye ici, ukutla, nga Lesa ali nokucita ico, cilingile casenda Lesa. Ine tekuti ncite. Eico, cili kuli iwe. I Cebo ico, I cine ico, namu Cimana cilefunguluka kuno kwine kuntanshi yenu. Impela ili mupepi. Yesu kuti aisa inshita ili yonse. Kutu caba ukutla kwena tekuti kube na United States, ilyo akasuba kalawa muno bushiku. Kutu batuma ama bomba aya atomic amakana yasano panshita imo; tekuti kube icibumbwa ica mweo pe sonde, muli ora imbi ukufuma nomba. Nga ulefwaya. . . Nomba cili kuli iwe.

Tontonkanya pali ico nomba ilyo tulepepa.

¹⁸⁵ Mwebapalwa Taata uwamu Myulu, pakwisalila kwa ici Cebo, ilyo Ndepilibula amabula ukubwekeshapo, i Mbila yakakatikwa nomba. Ukwisa kwa kwa Shikulu kulepalama. Abengi mucikulwa, muno lucelo, bacimya amaboko yabo nokutla, kuli ico, “Ndefwaya ukuba umwina Kristu. Ndefwaya ukuba umutuntulu, uwafyalwa cipya cipya umubomfi wakwa Lesa.”

¹⁸⁶ Shikulu, limbi imyaka iingi, Mwalibomba ne mitima yabo. Mwa—Mwalibeba ico. Ukusenamina Kwenu kwalifika kuli bena. Tabalaililila mukupwililika, lyena. Bamo baya kuncende, uko tabakabile. Umwaka wapitapo, bena baleimya ukuboko kwabo,

ukutila, “Ukuba, Ine kuti natemwa ukuba umwina Kristu.” Nomba cena caliya apatali nganshi; bena tabacumfwa nakabili nomba.

¹⁸⁷ Calipwafye! Kabili ico cimoneka kwati epo icalo cileendela, balomfwa bakasabankanya ba mbila nsuma, ilyo bapita mufyalo. Balituma ifyakumfwilako. Balicita fyonse. Balikwata amabumba ayo baampanya. Balatandalila amayanda, kuli abo abengemya amaboko yabo nokwesha. Uko amakana na makana batendeka, babili nangu batatu bali nokwikatilila. Ukuba, cena nacipwa, Shikulu. Cena nacipwa, Lesa. Ifwe natuya.

¹⁸⁸ O mwe Taata, Ninjishiba ukutila Mwatile, ukutila, “Bonse abo baishile kuli Kristu, Imwe kuti mwasunga.” Kabili Nalicetekela ico no mutima wandi onse. Kabili Nincetekela, Shikulu, ukutila Mwalasunga abo imitima yabo na mano yabo yekala pali Imwe. Kabili Nde Mutotela, Shikulu, pe Chalichi, kabili napa bashila abakwa Lesa uwamweo abo abali muli cilya Chalichi, u Mubili uwaku mupashi!

¹⁸⁹ Lelo, O mwe Lesa, ifyo umutima wandi ulatutuma palwa abo ababa kunse ka Ico, pakwishiba ukutila bamona icilembo pa cibumba, ukumona ifintu ifikalamba filecitika, ifilangililo. Na America naisulamo impulwe yafiko, namapologolamu ayabula ukufumyamo ifyabipa pafitunshi tunshi, pamilabasa, notushimi twacitemwiko, nabakapumya nabakaseka, namalila ayakalamba, nokusabankanya imbila nsuma iyaku Hollywood.

¹⁹⁰ Kabili, O mwe Lesa, yena—yena ninshita yapakati ka bushiku iilefika, icine cine. Ena ali uwaiteyanya ukuya. Kabili cinshi ico Ningacita, Shikulu? Ninsakamana; Nalilila; Nalilomba. Ine—Ine...Cili fye pali Imwe nomba, Shikulu. Ine—Ine...Ico fye ceka eco Ningacita. Ninshimikila ico. Ndeiminafye pa Cebo, Shikulu. Ndeesha ukunina ukuya kunkambi nomba. Tapakokole.

¹⁹¹ Nomba, mwe Lesa, kuli abo abakwata umutima wa cishinka ileelo. Lesa, citeni icintu cimo kuli bena pali ino ine nshita. Lekeneni babe abana Benu, ukufuma buno bushiku ukuya kuntanshi.

¹⁹² Undapeni abalwele abali pakati kesu, Shikulu. Balengeni bondapwe. Bwesheni abo abapona abatalala, Shikulu. Lekeneni bena beshibe ukutila balifye...Baleangala pa mushili uwa bucenjeshi nganshi. Mukwangufyanya bena bakaya, ikaba ninshi inshita naipwa. Peleni nomba ukutila u Mupashi Wenu walabomba nganshi na ifwe. Mwi Shina lyakwa Kristu. Amen.

¹⁹³ Ku bantu abacaice, kuti Nalanda ici: Nga kuti Nacita... Munu lucelo, panuma ya bushiku bwa kufyalwa mailo pa myaka amakumi yane na cine konse konse muli uno mweo, imyaka amakumi yabili na imo iyaibela iya ico, nalimo imyaka amakumi yabili na ine Nabombela Shikulu Yesu, ngo mulumendo uwa myaka yakufyalwa amakumi yabili na itatu Na—Na tampile

ukushimikila i Mbila nsuma, nga cakuti kuli ifyakulanguluka ifyo Nakwata, ifyakulanguluka ifili fyonse, nga kuti Nakumya ibatani nokubwekela ku—ku myaka iisuma iye kumi limo na mutanda nangu cine lubali, Ine kuti nafwayafye ukucita ico pa cintu cimo, ico kubombela Kristu.

¹⁹⁴ Ico eflyo cipilibula, ukubombela Kristu eka. Lesa Uyo waishiba umutima wandi, alishiba ukutula ico cishinka, ukubombela Kristu eka. Nshatala monapo icintu nangu cimo, nangu ukutontonkanya icintu icili conse, icalingana nenanga iyapalwa iyaka Kristu mumutima wandi, Nshaishibapo nangu cimo.

¹⁹⁵ Nalyabuka ba bembu, Napupwike ukupita mulwelele, Nalimona ifyakutamba fyonse ifyo isonde lyakwata, Nalimona ifyankama cine lubali ishe sonde, Nalimona ifintu cine lubali ifyapulamo, ntile, ifye sonde, Nalimona impili, mupepi, mwisonde, Naliba, Ndi kalunga, Nalilunga mufyalo ifyapusana pusana, Nalicita ifintu fyonse, naliloba, Nalinina bakabalwe, Nalisungapo inama, Nalicita ifintu fyonse ifyo Naishiba ukucita, kalili Nalalanda ici: ukutula kwaliba, fyonse ifi ukufibika pamo tafipanga akalitoni kamo akanono ku kutemwa kwa kwa Shikulu Yesu Kristu.

¹⁹⁶ Cinshi ico Ningacita? Cinshi icinga... Oh, ee, aba abaice abanono pano. Nalikwete ba cibusa bandi abanono abakashana, nokusakula imishishi yandi panshi. Kabili nalebika icakucinga candi pali motoka yandi, nokuya nacibusa wandi kukutandala. Natontonkenye... Lelo cena tacanjikwishe. Paliba cimo icintu ico ubulisha, inshita yonse.

¹⁹⁷ Nalimona umukashana namenso ayasuma ayacinyamuti, kabili kuti... Namwishiba ifyo mwingomfwa, nga bacibusa abaice. Natontonkenye ukutula ico cali eco. “Nga kuti Nayapo mukutandala noyu umukashana umunono, kuti caba fye... kuti—kuti cantalalika. Ico, ico kuti capwisha ico.” Kuti nayatandala nankwe, kabili nokuba nankwe, ama miniti ikumi limo na yasano, kabili nalafwaya umuntu umbi. Cena tacikushafye. Oh, tamwaba nangu cimo.

¹⁹⁸ Lelo, ilya ora iyapalwa! i Shina Lyakwe lipalwe! Mulya mung’anda yakusungilamo amalasha, kunuma yacikulwa, nafukeme pesaka ilyakale ilyafyani, mukashila, emo Nafukeme panshi mulya mumushili uwabomba, kabili natile, “Shikulu Yesu, bushe kuti Mwancitilako icintu cimo?” Ilyo e lintu umutende uyo wacila pakwiluka konse, imyaka amakumi yabili na ine iyapitapo, wakobebe muno muli uyu mutima wandi. Kabili calingana pafintu fyonse ifyaba mwisonde monse. Nshamonapo icili conse icingapashanya naco.

Ukupita mufingi ifya busanso, ukubombesha
ne fiteyo,
Ifyo napitamo;

Kusenamina kwandeta uwacingililwa ukufika
 pano,
 Kwena kusenamina ekuli nokunsenda.

¹⁹⁹ Nali Mucetekela munshita yamalwele nobusanso. Nali Mucetekele ilyo indeke shaleshinguluka mumfula yacipupu, kabili tamwaishibe ico. Natile, “Shikulu Yesu, bushe Namupwisha naine? Nga teifyo, lungikeni iyi ndeke.” Nokuimona yabwelelamo, mumibele yacibamo iyalungama.

²⁰⁰ Naliminina mu makililiki umo ba dokota abaishibisha mufyalo, uku...Kabili balendolesha nokutula, “Maminiti fye ayanono ayakuba no mweo; ena aleya.” Kabili lintu ba dokota abaishibisha abo bengandetela.

²⁰¹ Kabili Natile, “Shikulu Yesu, bushe Namupwisha naine?” Kabili mukupumikishafye, Naishelabafye bwino nga fintu nali. Mucine.

²⁰² Oh, ukusenamina kwakupapusha, ifyo ico ciunda cawama! Ifyo Ningakabila nga Nalikwete indimi ishakulondolola ifyo cena cili. Calikulisha ku mano ya muntu. Mumfwe ifyo ndelanda. Mwisenda icakupyanishapo, cibusa. Mwisenda icakupyanishapo. Wiya fye nokutula, “Ukuba, nomba, Ndacita *ici*. Nde—Ndemweba, Ndi muntu umusuma nganshi.” Tamufwile ukushintilila pali ico. Tamufwile ukucita ico. Ikalenifye palya mpaka Icintu cimo caisa, cifumyapo ulubembu lonse, nokubikapo ukutomona kulya ukocafye. Kabili ilyo amesho yaisa, tamulingile ukutontonkanya nga cakuti Ndi nokucita ico cena Cintu cimo icikatilila uko.

²⁰³ Kabili ngo mwaume wa myaka yapakati nomba, Mfwile naisa nokutontonkanya ici, ukutula bumo pali ishi inshiku Mfwile ukuya. Nga Yesu akokola ukwisa, Ine mfwile naya. Nshishibe ifyo cikaba lintu Nkafika kumpela ya bulendo. Nshishibe. Nshilesubila mukushimikila kwandi. Iyo, mukwai. Iyo, Nshilesubila pafintu ifyo Nacita. O mwe Lesa, iyo. Oh, lekeni ico cibe ukutali ukufuma kuli ine. Nalicita ifintu, ukutulafye apo Nabela kashimikila, nshaposeleko amano nokucita *ici* na *ici*. Nshilefwaya ukucetekela mucintu icili conse, ico. Iyo, mukwai. Nshilefwaya ukutula, “Shikulu, Nalinonka imyeo ukucila pali millioni kuli Imwe.” Ico tacakwatapo nangu cimo icakucita naco; nangu cimo. Icintu fye cimo ico Ndesubila, kusenamina Kwakwe, ubulayo Bwakwe, i Cebo Cakwe.

²⁰⁴ Shikulu, Mwatile...Nangu Nyenda mumupoka poka wacinshingwa camfwa, Nshakatine ububi. Mwatile, “Nshakatale musha nangu ukumulekelesha.” Lintu Ndele pali ulya musamino, nelibe ilyatalala ilyamfwa lilefuma pa mpuni yandi, Akaba palya. Ukuba fye uwashininkisha ngefyo Njiminine pano, Ali nokuba palya.

²⁰⁵ Ilyo Nashimikila imbila yandi iyakulekelesha, naiisala Baibele nokwenda inshita ya kulekelesha, umulimo naupwa;

Akabapo. Ee, mukwai. Kabili Naba fye uwashininkisha ngefyo Nacetekela ukutula Akesa; ilyo Akesa nakabili, Nkabako kulya, naine wine. Ee, mukwai. Te pa mulandu wakutula Nininga. Nipa mulandu wakutula Alinkwatila, ine. Kabili Nalishiba, ukupitila muli ico, ukutula kwaliko icintu cimo icacitike. Icintu cimo calicitike. Takwaba icongo icingi ico Ningapanga, ifyo Ningalanda bwino. Nga cakuti Nali kashimikila uwaishibisha nganshi mwisonde, nga cakuti Nalibushishe abafwa, conse fye, ico tacikwetepo icakucita na cena. Ni pa mulandu wakutula icintu cimo calicitike. Icintu cimo calicitike *muno*. Califumishepo akalumwa akakale, nokusashila, nobubi, nafyonse fye, ukufuma mu mutima wandi. Kabili nomba Nali Mutemwa fye, akasuba no bushiku. Icintu cimo calicitike. Ndefwaya uku Mumona, ubushiku bumo. Ndefwaya imwe, naimwe, pamo.

²⁰⁶ Mwe chalichi cinono, bulecucutikila Ubufumu bwaka Lesa, mwikabwelela inuma mubushiku buno. Nga mwacita ico, mukwangufyanya mukalapile, mukabwekelamo. Mwamona? Nga mwaipuntula kucikondo, mwikapona. Nga cakutula mwapona, mukeminine. Ukwima. Owe! Ukwima. Icine cine.

²⁰⁷ Nga walipanga icilubo. Nomba, mukupuputulwa ukuleisa... Walibwekelemo nokutalala, bucaibela. Shibuka, kabiye kuli Baibele yobe. Enda mwibala lyauma apo kuncende imo. Yebe wemwine, nokutula, “Mwe Lesa, nomba Ndi pano. Njeleleniko pali ici cintu.”

²⁰⁸ Muli nokufopaulwa pali ico, ibukishafye ico. Ee, mucine. Uli nokusombola ifyo wabyala. Ee, mukwai. Lelo, fyonse ifyo ucita, twala uku kufopaula kuno. Ima nokuyololola, kabili tila, “Mwe Taata, Ndi pano. Mfopauleni nga fintu Mwamona ifingalinga, Shikulu. Ine Ndi pano.” Ico nacilungama. Nomba enda ukubwelelamo kunuma, na “alleluya” pa mutima obe. Lesa aleka ukulopola pali iwe, iwe tilafye, “Ee, Shikulu. Ine mfwife na conse icinono ica ico.” Iwe twalililapofye ukuya. Lesa ali nokumusenda, cisuma. Cena cikapwa, bumo muli ishi nshiku.

²⁰⁹ Ndetontonkanya lulyo lwimbo ulusuma ulwakale Munyina Neville nabena baleimba, “Ine nombaline ndi nokufumamo, mumafya namufyakweshiwa.” Ee, ico nacilungama.

²¹⁰ Nibanga aba Mutemwa? Leken i tumone amaboko yenu? Cisuma. Tupeleni apakutampila, *Ukusenamina Kwakupapa*. Umuntu onse abe fye tondolo, pakashita akanono. Panono panono nomba.

Ukusenamina kwakupapusha! ifyo ici uunda
cumfwika icawama,
Ico icapuswishe uwaonaika nga ine!
Nalilubile inshita imo, lelo nomba Ninsangwa,
Nali impofu, lelo nomba Ndemona.

Kusenamina ukwafundile umutima wandi
 ukutina,
 Kabili ukusenamina ekwapwisishe ukutina
 kwandi;
 Efyo kwaba ukwawamisha ukusenamina
 kwamoneke
 Ora iyo Nabalilepo ukusumina!

Nomba ifwe bonse, capamo.

Ilyo twaba kulya imyaka amakana ikumi,
 Tulebalika nga kasuba;
 Tatwakwata inshiku ishinono ishakwimba
 amalumbo yakwa Lesa
 Ukucila ilyo twatendeke ntanshi.

²¹¹ Naleumfwa umukalamba Doc Davis, abengi muli bena, kabili Nalyumfwa abengi aba mushilo abakale, ilyo baleisa, panuma baile, kabili nobupyungishi bwalefika pakukula. Nalibomfwa balelanda pafyo bomfwa. Elo batendeke ukucumfwafye nomba. Ameni. Elo bendekefye ukwiluka. Oh, ifyo, ifyo caba icintu icawama!

²¹² Ni cinshi ico ngingekatililako ileelo? Ni kwisa uko Ningaya? Nikwisa uko muleya? Ameni. Ni cinshi ico Ningacita? Kwisa? Ni cinshi icingacitika kuli ine ileelo nga te Kristu? Inga isubilo lyandi kuti lyaikatilila kwi? Kutu naba uwafulungana. Ilyo Namona ico cili mupepi nokucitika, kabili nokwishiba ukutula ico e conse ica cena, inshiku pe oh, owe, nicinshi ico Ningacita?

²¹³ Lelo, oh, Ndi uwansansa nganshi. Ndi uwansansa nganshi. Kwena kutula kwakasuba. Ifwe tulifye muciloto. Tulepekanya ukubuka. Oh, muciloto icakutinya, nga fintu cali; ukufuma muli cena, ukwisa munshita yakupuka kwafintu; ubusepela ubwamuyayaya, ubumi ubwamuyayaya, insansa shamuyayaya, umutende wamuyayaya. Bushe taciweme? Ali umutuntulu nganshi!

²¹⁴ Ndeingililamo nibanga muno abalwele nomba, kabili balefwaya ukupepelwa? Lekenitumone amaboko yenu. Cisuma.

²¹⁵ Ndefwaya ukumweba icacitike uno mulungu wafumineko. Twalikwete ifintu fimo ifyawamisha ifyacitike mukulongana, mucine, pacintamba. Kabili Ndesa mu—mucipasho ca cintu cimo, ico cilemonekafye ukuba icikalamba ukucila ifyo cena cali.

²¹⁶ Ninjisa ku cintamba kabili Lesa alipela icabupe ica—icabupe ca busesemo, ico cinga . . . Ico nacicilapo palipusho. Kutu nashininkisha ico kuli iwe, pano pene. Mwamona? Ico nacicilapo palipusho. Lelo Ndemona ukutula tacilecita umulimo munshila cifwile ukucita, pantu cabupe fye. Icintu cimbi, cena muntu umo, mwamona. Cena ciminine ku muntu umo, ukupitila mucabupe.

²¹⁷ Lelo Nalicitile icintu cimo ubushiku bumbi, nalyeseshe ukuleta abantu mu Oakland, palya pene fye apo i . . . mu

cibansa icikalamba kulya. Natile, “Ukubapo fye Kwakwe,” nokwikalafye pamo na cilya Cebo. Nokuleta abantu na . . . Bushe namwishiba? Kwali ukundapwa ukucila pafyo Ndecetekela Namonapo mumusonkano umo uwacitika, kunse ya misonkano iikalamba nga mu Africa nokushinguluka uko, lelo kubukulu bwaciko. Abantu ukwishibafye u Kubapo kwakwa Lesa, mukulongana, baikelefy palya nokuba mu Kubapo kwakwa Lesa. Kabili abantu baleima, abaundapwa; na menso yabo ayamabilu, yalungamikwa. Kabili, oh, cena cili . . .

²¹⁸ Ndecetekela cilefika kunshita uko . . . Paulo atile, “Apo apaba ubusesemo, bukafulika; apo apali indimi, shikapwa.” Ndecetekela cilefika kunshita mpaka ilyo abashila bakesaba pamo ngefi, kabili nomupashi wakutemwa ukesa pita mubantu. Kabili fye, umuntu onse mulya, conse ico icalubana cili nokufumishiwapo. Kuli nokuba u Kubapo ukwa Mupashi wa Mushilo.

²¹⁹ Nincetekela, ilyo ifwe twalabika amaboko pali bena nokubapepelako nomba, kukumya nalimo ukwa kwakwa kakumba uwasubwa, nokubikapo amaboko, nge palo fye kuli Lesa. Lelo Ndecetekela kuleisa inshita ilyo i Chalichi cakwa Lesa ciketwa, ngefyo, uko aba mushilo bakekala capamo, kabili u Mupashi wa Mushilo ukesamofye, ukubetafye, nga filya cali pa Bushiku bwa Pentecosti. Mwamona? Nokundapa fye abantu, nokwimya abantu, nefintu ifikalamba. Ndetampa ukucimona cilecitika.

Pantu, Ndemweba umulandu.

²²⁰ Abantu baliya nefyabupe, ico cishinka. Nshikwete ukutwishika ukulanda. Nshili kasusha wa muntu uuli onse. Ifyo bena bacetekela, ico cili kuli bena, mwamona. Lelo, Nalimona abantu abakwata bukapyunga ubwa fyabupe, lelo balile kabili, nga cingaba, bapangile i—i . . . Ni cinshi ico Ningalanda? Nomba, nomucinshi kabili nokutemwa, kabili Lesa alishiba ukutula cena cafuma mumutima wandi. Mwamona? Kabili balipanga kwati ku—kupanga indalama ukufuma muli ico, mwamona, ukubikafye abantu capamo kabili nokufwaya ukubikapo icintu cimo icikalamba. Kabili limbi bali fumya ulupiya, kabili, ukuba, ico kuti caba icalungama. Lelo cilemoneka kuli ine . . .

²²¹ Batila, “Ukuba, impela ileisa, cinshi ico abantu balekabila nendalama shabo?” Ukuba, cinshi ico *ule* kabila naco, palobe? Mwamona?

²²² Eico, i—icintu ica ico cili, caba fye ukutwala i Mbila nsuma ku bantu, mwamona, caba ukushimikila. Ndecetekela nga ifwe fye . . .

²²³ Kabili ifyabupe, mwamona, ifishibilo, kabili nomba, umuntu kuti aisa pano, muno lucelo, nokwiminina pano muli ici icintamba, nokucita ifisungusho fikalamba nefishibilo, ico tacilepilibula ukutula umuntu alipuswiike. Ifiwa filabomba

ifishibilo nefipesho amano. Mucine, filacita. Mucine, filacita. Kabili Baibele itila bali nokucita ifingi ukucila ifyo, mubushiku bwa kulekelesha. Ukuba, Yesu atile, “Abengi bakesa kuli Ine nokutila, ‘Shikulu, bushe Nshatamfishe ifiwa mwi Shina Lyenu? Kabili bushe Nshacita *ici*? Kabili bushe Nshacita *ico*, kabili fyonse ifi fintu?” Atile, “Nshaishibe. Fumeni kuli Ine, mwe bakabomba ba mampulu.” Mwamona?

Ndecetekela inshita ileisa . . .

224 “Ukulangishiwa kwa fya bupe kwapelwe ku muntu onse ukuba ica kunonkelamo.” Ico—ico cishinka. Nacetekela ukutila ifyabupe fisuma, kabili tulafikabila nokuficindika.

225 Lelo Ndecetekela inshita ileisa ilyo cikaba pa mulingo uwapulamo ukucila palya. Mulandu nshi, “Panuma fyonse ifi fintu fyapwa, ico icaba kutemwa kukatwalilila umuyayaya.” Mwamona? Cena kutemwa kwa kwa Lesa. Ifwe tuli fye—ifwe tuli nokwimininafye, ukushimikila ngefi, nangu ukulanda, kabili ukutemwa fye e kukekala mucikulwa. Whew! Owe!

226 Mulemona, buno e bushiku bwakushimikila. Buno e bushiku ilyo tulingile ukwisamo nokusenda ababembu nokubatinta ukubafumya. Mwamona ico Ndepilibula? Ico eco ukushimikila kwa Cebo kwabelapo, kwababembu, kabili nokubafumya. Nomba tulingile ukumona, mulya, kabili ifwe. . . Ifishibilo nefipapwa ficitwa pakubikapo indupi, nafimbipo, pantu cena kushimikila.

227 Lelo Ndecetekela inshita ileisa nomba ilyo cena cili fye nalimo. . . Chalichi cali fye mupepi nokukobwa ukusendwa. Mwamona?

228 Lesa takakwate umubili uwakupapa. Takakwate iminwe mutanda kukuboko kumo. Kukabafye iminwe isano kukuboko kumo. Umubili wakwa Kristu tawakabe uwakupapa. Kabili ilyo umuntu wakulekelesha aisa mu Mubili wakwa Kristu, lyena ninshi capwa. Cena ninshi capwa. Nshishibe nga ninani. Uyu limbi wali uwakulekelesha, muno lucelo. Limbi iwe waciba uwakulekelesha. Limbi kulya ku Africa, ileelo, uwakulekelesha ali nokuletwamo. Lelo lintu uwakulekelesha umo aisa, Ndepilibula u. . . Kuti watwalilila, ukushimikila i Mbila nsuma, lelo takwakabe ukwankula. Mwamona, takuli ukwankulako.

229 Nalelanda na Billy Graham nabena, uko baile muncende umo amakana amakumi yatatu, nangu amakana amakumi yabili nangu amakana amakumi yatatu bapilibwilwe. Bena bafililwe ukusanga abantu amakumi yabili nangu amakumi yatatu, mu mwaka wakonkelepo. Tontonkanyeni pali ico, tontonkanyenifye pali ico. Mwamona?

230 Nomba, ico cilenenga ukuba Calvin, bwino bwino fye. Mwamona? Ifyo Lesa apanga, Lesa alipanga.

²³¹ Nomba, Yesu tatalile esa pesonde muklandafye ukutila, “Nkatwala bakashimikila bakaye shimikapo ifintu fimo, bakabebe pafyo Nacita, kabili limbi umuntu umo kuti bang’u Mfwilako uluse nokupusuka.” Lesa tabomba mwi ofeshi Lyakwe ngefyo.

²³² Kulya, Lesa, pakutendeka alishibe bwino bwino uyo uukapusuka. Yesu aishile mukupususha balya abo Lesa aishibe ukutila bali nokupusuka. Tali uwakabila ukuti bengaluba, lelo, pakuba Lesa, Alishibe uwali nokuluba nowali nokupusuka. Eico nomba, Ena kuti alingila kabela. Te kulingila kabela, Ena—Ena uku-. . . Ku kwishibila kabela, Ena kuti abika mumutande, ukulenga ifintu fyonse ukubombela kubukata Bwakwe. Pantu, ico cili. . .

²³³ Ciwa—ciwa tba konse konse kabili tewamaka yonse, kabili taishiba impela ukufuma kukutendeka. Lesa eka ewacishiba ico. Ico e cintu cimo, Lesa aba fye pamulu *Apa*. Alishiba. Ciwa teshiba icili nokucitika. Teshiba icili nokucitika. Icintu fye cimo ico aishiba, cakutila ena ni ciwa fye, kabili acitafye ifyo ena engacita. Kabili ifintu fyonse ifyo engengilamo, alengilamo.

²³⁴ Lelo, Lesa alishiba impela. Amen. Eico, ifi Lesa alishiba impela, Ena kuti alenga ifintu fyonse ukubombafye bwino ku bukata Bwakwe. Amen. Oh, Nali Mutemwa. Owe, oh, owe! Mwamona? Ena ni Lesa. Eico, ibukisheni, lintu umuntu wakulekelesha akwete uwakwe. . .

²³⁵ Nililali ishina lyenu lyabikilwe mwi Buuku lya Mwana wa mpaanga ilya Mweo; mailo, umwaka wapwile, umwaka wakonka pawapitile? Iyo, mukwai. “Ily isonde lyalengelwe, ishina lyenu lyalibikilwe mwi Buuku ilya Mwana wa mpaanga ilya Mweo,” ifyo Baibele yalanda. Baibele itila, mu Kusokolola, “Kabili munkanyakristu abepele bonse abo abaikele pe sonde, abo amashina yabo tayalembelwe mwi Buuku lya mwana wa Mpaanga ilya Mweo, ukufuma ku mufula we sonde.” Ishina lyobe lyalembelwe lilya. Nomba, icintu fye cimo. . .

Mwatila, “Ni cinshi ukushimikila i Mbila nsuma, kanshi?”

²³⁶ Ukuba Baibele yalilondolola palwalala. Mwamona? Atile, “U Bufumu bwa mu Muulu bwaba ngo muntu uwasendele isumbu nokuya kuli bempa nangu muli bempa. Kabili aposele isumbu muli bempa, kabili ena alatinta.” Ico kushimikila i Mbila nsuma. Mwamona? Kwaliba bempa onse. United States ni bempa. Kabili ba kapyunga. . .

²³⁷ Nomba, Naya panshi, nokuya iminina mu Jeffersonville, pali *ici* cifutu ca bempa. Natila, “Munyina Neville, bushe ulamona?”

“Ee.”

“Calicitapo icisuma icili conse?”

“Te fingi.”

238 “Ukuba, lekeni ifwe. . .Nkaloba nobe pakashita akanono.” Kabili Nalaposa isumbu lyandi, kabili aposa ilyakwe. Kabili apa twatinta, ukushimikila, ukutintila mukati.

239 Ibumba lya bantu balesa, nokutila, “Ee, Ndefwaya ukusumina Shikulu Yesu.” Cisuma.

Llolesheni monse, “Bushe isabi nilisa? Lisa?”

“Nshishibe.” Mwamona?

“Ukuba, nomba, cinshi ico walacita nomba?”

240 “Ukuba, Nkaya kulya ku California. Shikulu alintuma ukuya ku California. Nkaya posako isumbu kulya pakashita akanono.”

241 Nkaya kulya nokuya posa isumbu lyandi nga *ifi*, nokusunkila mukati, ikana limo nemwanda isano lyaingila panshita imo. “Bushe bonse balipusuka?” Nshishibe. Balya bali palya. Nalasenda isumbu. Ilyo e sumbu lya Mbila nsuma.

242 Bamo muli bena, Baibele yalanda ukutila, nefintu fyapusana pusana fyonse ifyali mu menshi. Bonse bapemene pa menshi yamo yene, baikele mu menshi yamo yene. Bushe ico nacilungama? Mwamona? Mwali bafulwe ba mumenshi, bafulwe ba mu matipa, insoka, bacula, ba malinso, ifishishi, ne sabi ilituntulu.

243 Nomba, balya abali isabi ilyo isumbu lya Mbila nsuma lyapitile pali bena, bali lisabi ilyo bali kululamba. Abo abali bafulwe bapamenshi mwisumbu lya Mbila nsuma, bali ba fulwe palulamba. Tapakakokole ninshi babwekelamo mu matipa nakabili. “Nga kapoli ukubwelela mumatipa yaiko, kabili nembwa kumalushi yaiko,” bena balaya. Mwamona?

244 Lelo, pakutendeka, bena bali bafulwe, icakwambilapo. Cena te mulimo wandi ukutila bena nibafulwe. Nshishibe. Ndeposafye amasumbu, mwamona, ukuposafye isumbu. Lelo lintu isabi lyakulekelesha lyafuma mu menshi, munyina, ifyo efyo cifwile ukuba.

Oh, Shikulu Umwine akesa

Kabili akatila umulimo naubombwa,

Icitesheni cikapilibulwa panuma yakashita.

245 Ico nacilungama. Ico nacilungama. Ee, mukwai. Akatila, “Umulimo naubombwa, kabili naupwa. Wena naupwa,” lintu umo uwakulekelesha afuma.

246 Kabili kwaliba ibumba ilyakale ilyankumba ilipitana, nafyonse. Lesa aletinta isabi ukulifumya mulya, mukwangufyanya kuntu Engacita. Bakashimikila ukufuma kulubali lonse, baleasunshafye amasumbu ukufuma kulubali lumo ukuya kulubiye. Ifwe tulepomba na masumbu kuli umo no mubiye. Tuletinta namaka yesu yonse, amasumbu. Alifye mupepi nokuiteyanya. Akaposha icimana, umo pali ishi nshiku,

kabili ninshi capwa. Lelo isabi likaya kuyasuma, ayalengama amenshi kwishilya kulya, uko bakakwata u Mweo wa Muyaya inshiku pe. Amen. Oh, ilyo ulya uwakulekelesha akesa! Owe!

²⁴⁷ Kwen, ifyo lyaba ishuko, kuli Lesa ukutila, “Bushe kuti watemwa ukuba isabi?” Amen. “Bushe kuti watemwa ukuba isabi pe tebulo Lyandi? Bushe kuti mwatemwa ukwisa nokuba inama pe tebulo Lyandi?” Oh, owe!

“Mucine. Mucine, Shikulu.” Mwamona? Lelo, icifyalilwa cabo lisabi. Mwamona?

²⁴⁸ Lintu waba umwina Kristu, imibele yobe iba iya mwina Kristu. Taulingile ukutila, “Nomba, iwe—iwe—iwe tekuti, tekuti upeepe. Tekuti unwe. Tekuti ucite ico.” Taulingile ukulanda ico. Ena tacicitafye, nangu cibe ifyo. Mwamona? Icifyalilwa cakwe calipusana. U Mupashi wakwa Kristu uli mu muntu, kabili Kristu tacita filya fintu. Mwamona?

²⁴⁹ Watila, “Ulingile ukutemwa Shikulu. Ulingile ukuya ku chalichi.” Taulingile ukubeba abantu ico. Bakaya, nangu cibe ifyo. Bakenda ukupita mumfula. Bakaya. Bakapita mumfwa, pakuya ku chalichi. Mucine. Balikutemwa. Balingile ukufika kulya. Ico fye ceka ecabako kuli cena. Cena mweo wabo. Nga bena tabacitile ico, bena—bena bomfwa kwati balefwa. Mucine. Ee, mukwai. Ufwilefye wafika kulya, kabili ilyo icintu cimo cilepya mu mutima obe. Tekuya kulya mukutalikishanya, nomb, ukukanaya kulya mukutalikishanya, lelo ukuya kulya mukupepa. Owe! Kabili imwe mwaya ku ng’anda abacincimushiwa. Bushe bulya te mweo uusuma? Nibanga abaishiba ico? Leken tumone ukuboko kwenu. Oh!

²⁵⁰ Ico nacilungama, Gertie. Leken twimbe ulo. “Umutende! Umutende!”

... Mutende! Umutende uusuma,
Uleikila ukufuma kuli Taata ku Muulu;
Piteni pa mupashi wandi inshiku pe Napepa,
Mukutemwa ukukalamba ukwashika.

²⁵¹ Ndefwaya mucite icintu cimo nomb. Onse uyo uwikele mupepi naimwe, poshanyeni nabo mumaboko, nokutila, “Lesa akupale, munyina, nkashi. Ndefwaya nkakukumanye mu Muulu.”

Mutende! Mutende! mutende usuma,
Uleikila ukufuma kuli Taata ku Muulu;
Piteni pa mupashi wandi inshiku pe... (Oh,
owe!)

Mukutemwa ukukalamba ukwashika.

Palya pacapindama apo Umupusushi wandi
afwilile,
Palya pene mukuwamishiwa ukufuma
kulubembu Nabilikishe;

Kulya ku mutima wandi eko u Mulopa
 wabikilwe;
 Ubukata kwi Shina Lyakwe!
 Ubukata kwi Shina Lyakwe!
 Ubukata kwi Shina Lyakwe ilishinga cimfiwa!
 Kulya ku mutima wandi eko u Mulopa
 wabikilwe;
 Ubukata kwi Shina Lyakwe!

²⁵² Nomba ilyo tuleimba vesi yakonkapo, Ndeingililamo nga cakutla abalwele kuti baimininako, pano pene nomba, ukuti bapepelweko, kuno kwine *kuli* ulu lubali. Kabili Ndefwaya bakapyunga, nga kuti baisesa nomba mukutwafwilishako ukupepelako abalwele. Tantameni ku kuboko kwa kukukulyo, iseni *uku* lubali. Ico nacilungama, kuno kukuboko kwakukulyo, abali nokupepelwako.

Nalipusuka bwino bwino nganshi ukufuma ku
 lubembu,
 Yesu mu busuma nganshi aikala mukati,
 Palya pa capindama apo Ambulile
 nokunjingisha mukati;
 Ubukata kwi Shina Lyakwe!
 Ubukata kwi Shina Lyakwe ilyawama!
 Ubukata kwi Shina Lyakwe ilyawama!
 Kulya ku mutima wandi eko u Mulopa
 wabikilwe;
 Ubukata kwi Shina Lyakwe!

²⁵³ Tulishisheko *Shing'anga Umukalamba*, walacita ico, Nkashi Gertie, nga kuti wacita.

²⁵⁴ Nomba Ndefwaya ukumwipusha icintu cimo. (Nalabula ayo. Ee, mukwai.) Bushe muleisa nokwenekela, nangu nokwenekela, ukucila, ukutla mwalaundapwa muno lucelo? Cintu caba mu mutima, panshi nganshi? Nga walaisa ngefyo, cibusa wandi, Ndekupela icakushininkisha ukutla ukundapwa kobe kuli ukwashinikishiwafye nge pusukilo lyobe, mucishinka fye.

²⁵⁵ Nomba, ubundapishi bobe tabwaba ubwakutwalilila nge pusukilo lyobe. Ubundapishi bobe buli nokufilwa. Kuti waba... Nga cakuti waundapwa, uli nokulwala nakabili. Kuti waundapwa ileelo, ukufuma kukalaso, bwino bwino kabili uwabumi, batila “naupola,” kuli dokota, kabili umulungu uleisa wafwa nakalaso. Ico nacilungama.

²⁵⁶ Iwe kuti waba uwapwililika uwapwililika mumupwilapo ukufuma ku Ntanda Bwanga, uno mulungu; kabili imyeshi ibili ukufuma pali nomba, wafwa, ne cifuba ca ntanda bwanga. Yena kuti bapita mukweshiwa, ukwabula nangu kamo akabulungwa mu mubili wenu, ako bengasanga; kabili nomba wafwa mu milungu ibili naimbi, ne ntanda bwanga. Ico nacilungama. Mwamona? Kabili iwe ulingile ukufwa, nangu cibe fyo.

²⁵⁷ Lelo, ifyakunonkelamo! Davidi alililile ukutla, “Mwilaba kufyakunonkelamo Fyakwe fyonse. Pala Shikulu, O we mweo wandi: nafyonse ifyaba muli ine, palai i Shina Lyakwe ilya mushilo. Pala Shikulu, O we mweo wandi, kabili wilaba pafya kunonkelamo Fyakwe fyonse.” Ifyakunonekelamo! Icakunonkelamo cinshi mubulendo? “Uwelela amampulu yandi.” *Amampulu*, cintu ico uya mukucita, kabili walishiba ukutla taulingile ukucita ici. Ena alabelela uluse ico. Mula Mulomba, Amubelelo luse. “Alelela amampulu yandi yonse; uyo undapa amalwele yandi yonse.”

Nomba Ndefwaya ukumwipwisha ici, inshiku pe.

²⁵⁸ Nomba umuntu umo atila, “Munyina Branham, bushe walicetekela mubundapishi ubwa maka yakwa Lesa?”

²⁵⁹ Nomba lekeni nande ici mumano namukushininkisha. Ndefwaya umuntu umo, dokota umo, sayansi imo, kucifulo cimo, Ndebeta muli uku kupuputulwa, ukwisa kuli ici cintamba no kunangisha icifulo cimo apo umuntu uuli onse aundepwe kunse yakundapwa kwa maka yakwa Lesa. Nde—Ndefwaya ukaye kuli dokota obe, nangu ku muntu onse untu ulefwaya, kabili unangishe umuntu uuli onse uyo waundepwe kunse ka kundapwa kwa maka yakwa Lesa.

²⁶⁰ Ndefwaya ukandetele umuti uyo uwingondapa. Ndefwaya ukaletе dokota uyo uutila ena ni kondapa. Ni kondapa, cisuma, “akatende,” akatende kakwa dokota. Lelo Lesa e Umo fye Uwingondapa, nangu uwaundepepofye, nangu uukondapapofye.

²⁶¹ Nga natukwata umuti uwingondapa, kuti twakula umuntu pano pene pacintamba, nomuti. Ico nacilungama, kuti twakula umuntu, nokumupanga pano pene pa cintamba.

²⁶² Tontonkanyeni fye pali ici, ukundapwa konse kundapwa kwa maka yakwa Lesa. Lesa alikwata inshila sha kucicitilamo ico.

²⁶³ Nombaa, mwatila, “Ukuba, Munyina Branham, Balimombe, icamenene, nangu kumpela yabula. Nga dokota taiputwileko, nga Nalifwile.”

²⁶⁴ Ico limbi. Ico kuti limbi cishinka. Lelo bushe walishiba ukutla dokota tatalile akundapa? Dokota aseseshe icapindeme. Aputwilekofye ubula bwapampela. Ico e cintu calekalipa kuli iwe. Lelo taciposeshe.

²⁶⁵ Walifunine ukuboko kobe. Watila, “Ukuba Naliifuna... Ndecetekela, nga waifuna ukuboko, kuti waya kuli ba dokota.” Ine mucine kuti nacita ico. Lelo tekuti akundape.

²⁶⁶ Nga cakutla Naingila mukati, nokutla, “Dokota, undapeni ukuboko kwandi, mukwangufyanya. Mfwile nabombela pali motoka yandi muno cungulo kasuba”? Mwamona? Mulandu nshi, ena kuti—ena kuti aishiba ukutla Ndekabila ubundapishi bwamano.

267 Ena kuti atila, “Ine kuti nabika ukuboko kobe bwino.” Lelo ni nani ondapa?

268 Mwatila, “Munyina Branham, nga penicillini, ilyo bakupela pa—pabulwele, utushishi mu mbili obe, kwati tuswende na—na conse ico ukwete, akalaso? Bushe penicillini . . . Bushe penicillini taikundapa?” Iyo, mukwai.

269 Penincilini, penincilini wakwipaya utushishi, uwakwipaya utushishi ulepaya. Uwakwipaya utushishi ulepaya. Imiti yonse imbi ilepaya. Umuti taukula; ulepaya. Umuti ni kepaya, te kondapa. Nangeni umuti undapa. Nangeni umuti uushipaya, kabili tamwakwata umuti. Umuti ulepaya, wipaya utushishi.

270 Cimo nga mwalikwete ba koswe mu ng’anda yenu, kabili mwafumya sumu yaba koswe. Kabili bakoswe baletula ifipunda mu ng’anda yenu. Ukuba, sumu yaba koswe ilepaya bakoswe, lelo yena taekuti ilungishe ing’anda yenu. Mwamona? Penicillini, penicillini epaya akashishi, lelo Lesa afwile aundapa incende iyo akashishi kalya. Mwamona ico Ndepilibula?

271 Nangu cibe ifyo, i Cebo cakwa Lesa, tuli nokwingila muli ico. I Cebo cakwa Lesa tekuti ciipililike Icine. Cena mukupwililika Cishinka. Cena . . . Ndefwayafye uyo muntu ese nokubika umunwe obe pa Cebo, inshita iili yonse munshita mukupuputulwa, ukunanga icakupililika mu Cebo cakwa Lesa, apo Caipililike Icine, cena tekuti cibe icaolololwa ne Cebo cakwa Lesa. Pena tapaba. Icine cine. Cena tacabapo palya. Tamwaba ukupililikana mu Cebo, nakalya. Mucine.

272 Iwe nga naukwatera isambililo. Ine kuti nakulembela kalata imo nokukweba icintu cimo. Nakulembela kalata nanimbi kabili naimbi kalata. Icintu cakubalilapo namwishiba, aba babili balelanda pamasambililo yabili ayapusana. Mwamona? Mucine.

273 Lelo Lesa e Umo uwaundepepo fye, uukondapapo fye, nangu uwingondapapo fye. Nga wafuna ukuboko kobe, nomba, Ine kuti natila . . .

“Ukuba, Ninkwata ipwalonda, nga palwa ico?” Cisuma.

274 Nomba, nga ilye ncende inono uko cilya cimumena cakobama, nga Lesa, pa kutamfya ububi, kabili ubumi bwafuma muli uyo mumena, uli nokufwa.

275 Nga dokota aputula, lyena Lesa alingile ukundapa icifulo apo dokota aputwile. Nga taucitile ico, umulopa uli nokufuma ukufika kumfwa. Bushe ico nacilungama? Inga nga cakuti aputulako kumpela yabula, kabili Lesa takundepe, nomba nicinshi ici? Uli nokufwa apo pene.

276 Nga wafwasisha umo pa mushipa muno mumusebo kuno. Nga wafuma kunse kabili wafwasisha umo umushipa uupisha umulopa, kabili wasanga ukutula, pamusebo kunse kuno, umu umwakupita ubusali, kabili mona icalacitika.

²⁷⁷ Nga waya kabili wafwasisha uukalamba, wafumyako icakwisalilako icikalamba pano, cimo pafyakwisalilako amenshi, mona ifyo cikacita uko. Cikafiposha, kuno kufyakupompa amenshi.

²⁷⁸ Takwaba incende, takwaba nangu cimo, pamibombebe ya mwi sonde, ngo mubili wa muntu. Lelo kuti waputula imishipa iikalamba pabili, nokukakapo, kabili Lesa akapanga inshila yakupisha mumbali umulopa nokuutwala mumushipa ukalamba nakabili. Nga cakutula cena tacacitike; munshita ya mineti imo, nga cakutula ico cabwelele kunuma nokuma mu mutima obe, iwe, [Munyina Branham alisha iminwe yakwe—Kale.] kuti wafwa, nga *ifyo*, inshita yakubalilapo waifwena.

²⁷⁹ Kondapa ninani? Oh, owe! Lesa e kondapa. Mwamona, eico teti kube imibombebe yafimashini iinga bomba ngefyo. Cena maka yapulamo.

²⁸⁰ Balindashile bapatula umushipa ukalamba, mumolu yonse yabili. Mwamona? Kabili Lesa...palya, ine, umulumendo umunono umubembu, uwalefwa muli lilya ibala. Lesa alishibe ukutula Alefwaya ine ukushimikila i Mbila nsuma. Acilile umulopa. Nshaishiba palwa ico, kano umuntu umo anjeba, nangu Ine kuti nalolesha panshi nokumona umukofu. Mwamona? Lesa, mumishipa iikalamba!

²⁸¹ Nga mwatoba icakukakilako apa, imibombebe yamipompele, moneni apa mubuteko, icingacitika. Cikabwekela kunuma nokuciposha. Mucine cikacita ico. Yalya amenshi yaleya namaka ngefyo, yakasunka nokubwekela kunuma nakabili.

²⁸² Lelo Lesa alapisha pambali nokupanga umwakupita mumbi. Ninani ccita ico? Mano nshi yacita ico? Nangeni imibombebe yakupompa amenshi iingacita ico. Alleluya! Yena mano yakwa Lesa. Ena ni Kabumba mukalamba uyo ucita ico. Ee, icine cine.

²⁸³ Ni cinshi icilenga icimuti ukupusana ukufuma ku cibiye? Ni cinshi icilenga icuni ukukwata ilangi limbi ne cibiye, icapusana? Cinshi cilenga ukulila kwaciko ukuba ukwapusana? Cinshi citulenga ukuba fintu twaba? Yena Mano. Ni Lesa.

²⁸⁴ Mwitina nomba. Alipanga...Ubu bulayo Bwakwe. Te Munyina Branham. Bwana bulayo Bwakwe. “Nine Shikulu Uundapa amalwele yenu yonse.” “Nga umo nalwala, iteni abakalamba bamu chalichi, babasube amafuta, bapepeleni, ipapo lya cicetekelo likapususha abalwele. Ifi fishibilo fikakonka abo abacetekela. Nga babika indupi shabo pabalwele, bakapola.” Kabili nomba ubo butantiko nga bwacitwa, cisuminenifye nga fintu musumina ukulapila nokubatishiwa kuno. Fumenipo, tileni, “Mulimo wapwa. Capwa.” Mwamona?

²⁸⁵ Lelo tulelolela pa cisungusho cimo icikalamba nganshi ukucitika. Cilacitika nga cakuti kuli icicetekelo icalinga icakucilenga ukucitika. Lelo nga cakutula tapali icicetekelo

icalinga ukucilenga ukucitika, cena cili nokucitika nangu cibe ifyo, munshita.

²⁸⁶ Lolesheni paco Yesu alandile mukwilula kulya, ilyo Alandile palwa lupili. Atile, “Munshita, cikesa citika. Nga waipusha ulu lupili ukusela, kabili wacetekela mu mutima obe lukasela,” atile, “munshita, cikesa citika.” Mwamona? Cikacitika.

Nomba naulwala. Mwebengi mulefwa, mumibele iyabipa.

²⁸⁷ Ndemona abekatilile umwaume pano nomba. Umuntu umulwele nganshi. Ipwalonda cintu icabipisha, lelo Lesa kuti aundapa ipwalonda. Owe! Kuti namulangisha muno. Nibanga muno abatala. . . Bushe kuliko umuntu umo muno nomba, uyo waundepwe ne pwalonda? Imyeni amaboko yenu. Lolesheni pano, ni konse konse mu chalichi. Mwamona? Mucine, konse. Twalibeba ukubaleta, pantu Lesa ni kondapa.

²⁸⁸ Nomba, cila umo muli imwe kunse uko, mukutotela, Ndefwaya mukontamike imitwe yenu, ndefwaya mupepe. Munyina Neville, isa kuno. Kabili nomba ilyo imwe mwe bantu. . . Ndefwaya abakalamba ukwisa kuno, pakutila twingapepelako abantu. Kabili ilyo mwaisa kuno. . . Citeni ici nomba. Ilyo mwaisa kuno, cetekeleni ne mitima yenu yonse. Kabili sendenifye iyandi. . . te cebo candi, lelo i Cebo cakwa Lesa, palwa ico. Cetekelafye nomutima obe onse. Ico e cicipwishisha. Ico eco. Nacipwa. Lesa efyo alanda. I Cebo Cakwe efyo calanda. Cena tekuti cibilwe.

²⁸⁹ “Nshilesakamana ifyo Ndeumfwa. Ndeya pantanshi, nangu cibe ifyo, ndetila Cena Cine.” Moneni icalacitika.

²⁹⁰ Lelo, mwamona, ngacakutila twaiminina kunuma kabili, nokutila, iseni mu mulongo wa kupepelwa nga *ifi*, tekuti cicitike. Epela fye. 

57-0407M Lesa Alasunga I Cebo Cakwe
Branham Tabernacle
Jeffersonville, Indiana U.S.A.

BEMBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalemwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org